



Ramu NiCo na OTML bungim hevi ...Metal prais pundaun

James Kila na Aja Potabe i raitim

BIKPELA pundaun bilong wol metal prais i givim bikpela pret na bel-pen tru long tupela wol klas maining projek long PNG.

Na dispela i ken kamapim hevi long kantri bikos nau yet gavman i sot long mani long ranim kantri na takis mani gavman bai kisim long dispela tupela maining projek bai no inap bikpela.

Pundaun bilong nikel prais long wol maket i givim hevi long nikel/kobalt divelopa long PNG, Ramu NiCo Menesmen (MCC) Limited long Madang provins.

Long wankain taim, dispela pundaun bilong prais bilong ol metal i daunim prais bilong gol na kopa tu long wol maket na wol klas Ok Tedi kopa maining long Westen Provins i kisim bikpela taim.

Wankain olsem ol narapela metal olsem gol na kopa, prais bilong nikel i wok long go daun yet nau long dispela taim long wol maket.

Ok Tedi Maining Limited (OTML) i tok em i wok long bungim bikpela salens bihain long prais bilong gol na kopa i wok long go daun insait long 6-pela yia nau.

Bihain long drai sisen i kamap na level bilong Flai Riva i go daun Ok Tedi maining i bin pas tasol OTML i lukluk long opim gen maining long Februari o Mas neks yia.

Ramu NiCo i wok long go insait long komisining stes bihain long prodaksen i bin stat long Disemba 2012.

Ramu NiCo na OTML wantaim i wok long katim daun ol kos bilong ranim maining oprensens.

I go moa long pes...

Opim nupela Senseri haus...



KATIM RIBEN LONG OPIM: Asbisop John Ribat (namel) bilong Pot Mosbi Katolik Asdaiosis i katim riben long opim nupela Senseri bilding, em hetkwata bilong Asdaiosis long laswik Sarere. Long raithan, em Pater Rodrigo Campilan husat i bin go pas long ol wok long nupela bilding na bosman bilong SVS na bikpela sapota bilong Asdaiosis, Hidezhe Hanasi. Long hankais holim riben i stap em Adrian Chow bilong Lae Biskit we famili bilong en em ol pren, sapota na strongpela Katolik. *Moa stori long Pes 12. Poto: Julimark Castaneda*

INSAIT Tupela man
kikim het bilong
Reza Barasi i
ronawe - **P2**

Asailam sika man
givim bel long
meri Manus
- **P4**

BSP bringim
Krismas
long haus
sik - **P10**



Rot projek
bilong ol
meri Buka
- **P11**



**Friends love
to share**

One SIM for you & one SIM
for your bestie, only on
the friendlier network.

76003555 or 1555
connect@bmobile.com.pg

Connect with us on  

www.bmobile.com.pg



Supporting
**PNG
MADE**

Bestie
two SIM pack
K5
only

 | 

Tupela man kikim het bilong Reza Barati i ronawe

MEMBA bilong Manus, Ronnie Knight i tok tupela laspela man husat i putim sefti but long het bilong asailum sika, Reza Barati, bilong kantri Iran i ronawe i bek long kantri bilong tupela yet.

Mista Knight i tok dispela tupela man bilong Australia na Nu Silan, husat i bin kikim het bilong Reza Barati wantaim sefti but o strongpela sefti su, i ronawe go bek gen long ples bilong ol.

Reza i bin lusim laip bilong em bihain long ol sekuriti i bin paitim em long Rijonol Asailum Prosesing senta long Manus Ailan las yia.

Kot long PNG i holim nara-

pela tupela boi Manus, we ol sekuriti gad i tok tupela tu i bin paitim Reza. Taim kot i holim dispela tupela boi PNG, narapela tupela man we witness i tok tupela tu i bin paitim Reza, i ronawe i go bek gen long kantri bilong tupela yet.

Mista Knight i no wanbel long Australia na Nu Silan i haitim dispela tupela man bilong kikim Reza wantaim sefti su.

Em i singautim Australia na Nu Silan long kisim i kam-bek dispela tupela man na kotim tupela aninit long ol lo bilong PNG.

Mista Knight i singaut long PNG gavman long luksave

olsem Australia i laik yusim PNG long 'tromoi ol pipia bilong en'i kam long Manus Ailan.

"Australia i mas kisim i kam aut dispela man husat i bin kikim Reza long het bilong em wantaim sefti su. Nu Silan i mas kisim i kam aut narapela man husat i bin kikim Reza.

"Samting i no go stret taim Australia na Nu Silan i haitim dispela tupela man na kot i larim tupela boi Manus i sanap long ai bilong jas.

"Australia na Nu Silan i mas bihainim ol lo bilong mipela. PNG em i gat lo olsem ol narapela kantri i gat.

"Mi no wanbel long dispela tupela kantri i haitim tupela man husat i bin laspela man long kikim het bilong Reza wantaim strongpela sefti su tupela i werim," Mista Knight i tok.

Australia i gat nupela Hai Komisina long PNG

LONG Desemba 2 las wik, Minista bilong Foren Afes long Australia Julie Bishop i tokaut long nem bilong nupela Hai Komisina bilong Australia long PNG, em Bruce Davis.

Bihain long olupela Hai Komisina, Deborah Stokes i bin lusim Papua Niugini Austalia Hai Komisen long PNG i bin stap aninit long wanpela meri Ekting Hai Komisina em, Bronte Moules. Tasol las wik Australia Hai Komisen long PNG i salim wanpela toksave pepa i ka-



Bruce Davis, Nupela Hai Komisina bilong Australia long Papua Niugini.

maut long ol i makim pinis nupela Hai Komisina, em Bruce Davis.

Australia i gat bikpela invesmen long PNG wantaim longpela taim histori namel long tupela kantri. I gat tupela wei treid patnasip em i stap namel long tupela kantri long mani mak bilong AUD\$6.8 bilien. Moa long en tupela kantri i gat ol strongpela difens na polis wok bung long makim wankain tingting bilong sekunriti long rijon bilong yumi.

Aninit long eid patnasip wantaim Papua Niugini Gavman, Australia bai investim \$554.5 milien long 2015-16 insait long wok bilong helt, edukesen, transpot, lo na jastis, strongim ol meri na eid bilong treid.

Mis Bishop i tok, bikpela invesmen bilong Australia long PNG em bilong daunim hevi bilong poveti na strongim ikonomi long go bikpela.

"Australia na Papua Niugini i wok-bung klostu wantaim long Pasifik Ailan Forum, APEC na Yunaitet Nesens, Mis Bishop i tok.

"Mista Davis i bin stap olsem Vais-Presiden bilong Esien Developmen Benk. Em i bin wok long ovasis olsem Australia Embeseda long Ailan, olsem Deputi Seketeri long Pasifik Ailan Forum na em i bin stap olsem Dairekta-Jeneral bilong Australia Eid Intenesenel Developmen (AusAID) pastaim long yia from 1999 until 2009.

"Mista Davis i gat Basela ov Ats long Histori na Politikal Saiens long Yunivesiti ov Queensland. Em i bin kisim luksave medal bilong Pablik Sevis long yia 2004 na tu em i bin kamap Memba bilong Oda ov Australia long yia 2009 long sevis em i givim long intenesenel rilesens taim em i bin lida bilong AusAID na developmen na rifom bilong Australia ovasis eid program," Mis Stokes i tok.

Em i mekim luksave na tok tenkyu tu long pastaim Hai Komisina bilong Australia long Papua Niugini, Deborah Stokes long ol gutpela wok helpim bilong em long mekim Australia gavman i putim moa mani na wok long PNG stat long yia 2012 i kam inap nau.

Australia i sapotim wok long rot i go long Kieta Port

AUSTRALIA na gavman bilong Atonomas Bogenvil i redi long stretim rot bilong Arawa i go long Rigu bris, wanpela projek bai isapotim gro bilong ekspot, lokal bisnis na ol pipel bilong baim ol prodak.

Ol dispela wok we Dekenai, Bogenvil Earth Works, Kompaini na Eastrac i karim aut em i hap bilong bikpela K13.3 milien projek we i gat olgeta 8-pela rot i pinis long taun rot bilong Arawa.

Rot long Arawa taun i go long Rigu bris i bungim Kieta Pot long olgeta hap long Sentral Bogenvil na i go het. Dispela Port i save kisim moa long 150 kontena olgeta mun wantaim ol hatwe, ol bilding saplai, medikol saplai na planti moa.

Menesa bilong Kieta Port, Charlie Tabura, i tok ol i mekim rot gut bai i kamap wanpela gutpela samting insait long Bogenvil.

'Stretim kwaliti bilong rot bai daunim ol taim bilong raun na daunim kos bilong stretim ol kar na mekim gut sefti bilong olgeta pipel i save yusim rot.

Dispela em ol namba wan samting long mekim bisnis na ol kastoma bilong ol.'

'Kieta Port i save ekspotim ol kakau na kopra i go long Singapore na Nu Silan. Dispela rot bai sapotim ol sans bilong groim egrikalsa sekta long Bogenvil,' Mista Tabura i tok.

Long wankain taim, Ekting Hai Komisina bilong Australia, Bronte Moules i tok, 'Australia i amamas long givim mani long dispela projek long bungim gut ol pipel na ol bisnis bilong Bogenvil. Ol kain kain transpot bai i seif long bung na bai isi long gat bikpela senis long rijen,' Mis Moules i tok.

Ol i stretim Arawa rot

LONG wanpela bikpela senis bilong Arawa taun ikonomi, gavman bilong Australia na Atonomas Bogenvil i pinis long stretim 8-pela bikpela rot insait long taun.

Dispela K4.3 milien wok we ol kontrakta olsem Dekenai, Bougainville Earth Works, Kompaini, loro Roadworks, Central Bougainville Engineering na Eastrac i mekim gut long sefti na daunim taim bilong raun long rot bilong Arawa na givim wok long 100 pipel long hap.

Mama bilong bisnis long hap, Bertha Lorenz, i lukim long pastaim olsem planti pot hul na rot i nogut i mekim ol i raun i kisim longpela taim long Arawa taun na mani bilong stretim kar i save go antap.

'Em i save kisim sotpela taim tru nau long kisim ol klaien i kam long ges haus bilong mi na go long maket o benk. Ol rot i

seif nau, na mipela i ran isi tasol,' Bertha i tok.

Dispela rot projek i kamap long pastaim Australia i bin givim mani long mekim rot namel long Morgan Junction na Tunuru na mekim gut rot long Bogenvil na ol liklik rot long Arawa saut long Buin, Tonu, Sovele, Jaba na Panguna.

Long wankain taim, Ekting Hai Komisina bilong Australia, Bronte Moules, i amamas long lukim ol senis i kamap long transpot netwok bilong Bogenvil.

'Pinis bilong dispela projek i lukim wanpela gutpela taun i bung na isi long kisim ol sevis olsem haus sik, maket, polis na ol skul. Nupela rot tu i helpim ol bisnis envairomen long Bogenvil,' Moules i tok.

Dispela projek bai i gat nupela lain mak bilong ol rot bung na 25 rot sefti sain.

Ramu NiCo na OTML bungim hevi

I kam long pes 1...

OTML bai katim daun 10 pesen wokfos bilong en. Ol wok manmeri long Tabubil na Kiunga husat i save slip long haus bilong kampani bai no moa stap tasol ol bai flai in na flai aut long wokples.

Ramu NiCo bai no inap rausim ol wokman bilong en. Tasol em bai stopim ol donesen na sponsasip, na bai no moa kisim ol nupela wok manmeri.

Tupela kampani wantaim i mekim dispela ol samting long sevim mani o sevim opresenel kos na larim maining projek bilong tupela i go het yet.

Ramu NiCo i wok long traime hat tru long go kamap long 90 pesen prodaksen mak bilong en wantaim gutpela wok i kamap long ol teknikal eria, tasol menesmen bilong Ramu NiCo i wari tru bikos prais bilong nikel i wok long go daun tru yet na dispela bai kamapim bikpela hevi stret long



Maski prais blong nikel long wol maket i pundaun, wok maining long Kurumbukari nikel/kobalt maining long Madang Provins i go het yet.

sait bilong fainens o mani insait long kampani.

Prais bilong nikel nau i pundaun i go daun olsem US\$ 8800 (K26 400) long wanpela tan, na dispela i givim bikpela wari tru long kampani,"

Dispela bikpela invesmen bilong China Metulojikal Kopresen (MCC) em mak olsem US\$ 2.1 (K6.3)

bilien, tasol Ramu NiCo long stat long prodaksen i kam inap nau i no wokim wanpela win-mani.

Insait long wanpela mani ripot, Ramu NiCo i tok Kampani i wok long lusim mani yet bikos prais bilong nikel i woklong pundaun yet. Dispela bai luk olsem Projek tu bai bungim bikpela hevi long sait long mani na tu MCC bai bungim hat-

pela taim stret bikos dispela mama-kampani tasol em nau yet i wok long sapotim Ramu NiCo Projek.

Menesmen bilong Ramu NiCo i toksave pinis long olgeta wokman meri bilong en olsem em bai no inap rausim ol long taim bilong dispela hevi. Tasol em bai wok strong long sevim mani long sampela ol bikpela eria wantaim ol bikpela wok-plen em bai kamapim klostu taim.

"Ol dispela lo bilong sevim mani i mas kamap olsem kisim tok-orait long kos bilong prodaksen, stop long kisim nupela ol wok-lain, na sekim gut mak bilong ol samting bilong baim long 2016, stopim olgeta donesin na sponsasip," Ramu NiCo Menesmen i tok.

Ramu NiCo i kamapim bikpela mak bilong prodaksen long pinis bilong mun Oktoba 2015, na tu gutpela wok i kamap long stretim planti ol hevi long Kurumbukari

Main na long Basamak Rifaineri. Tasol daunbilu prais bilong nikel tasol i wok long givim hatpela taim tru long sait long mani na wok bilong kampani nau yet.

Presiden bilong Ramu NiCo, Wang Jicheng i tok em i bilip olsem yia 2016 bai gutpela yia na dispela bai helpim kampani long kampim veliu long wok bilong en we olgeta lain i ken amamas. Tasol olgeta lain i mas bilip olsem prais bilong nikel long wol maket i mas orait.

"Nau long dispela taim, bikpela lukluk bilong mipela em long daunim operesinol kos bilong prodaksen bilong mipela long go kamap long 100 pesen disain kapasiti mak," Mista Wang i tok.

"Mi laik lukim olsem ol gutpela wokman bilong Ramu NiCo i ken go long haus wantaim pe-paket bilong ol na ol seaholda bilong kampani i kisim helpim i kam long dispela projek we ol i wet longpela taim long en," Mista Wang i tok.

Yumi mas mekim eksen nau – Dame Meg

“Solwara em i lewa bilong Pasifik. Mipela i save lukluk long solwara long kaikai, slip na kirap, kalsa, amamas na trenspot em antap long solwara tasol.

Bikpela ikonomi bilong mipela em long solwara na ol risos bilong en. Solwara wantaim klaimet i konekt o pas wantaim. Taim yu senisim klaimet em yu senisim solwara na senisim laip bilong ol pipel tu,” Seketeri Jenerel bilong Pasifik Ailan Forum (PIF), Dame Meg Taylor i tok.

Olsem Pasifik Osen Komisina tu, Dame Meg Taylor i toktok long bikpela samting solwara i save mekim long ol pipel bilong Pasifik long Tunde long COP21 kibung long Paris.

‘I no olsem bipo em i no bin bikpela samting long toktok strong long Pasifik, long ol salens bilong klaimet senis mipela i lukim. Dispela singaut mipela i painim aut long Pasifik Ailan Forum Lida Dekleresen long Klaimet Senis Eksen. Disisen mipela i mekim tude bai i gat senis tumora long rijen. Eksen i mas kamap nau,’ Dame Meg i tok.

Em i tok mipela i mas gat wanpela bikpela driman na

wanpela agrimen i bung insait long lo bai i tok klia long agrimen we bai i toktok long ol hevi i gutpela bilong stap laip we planti spika i toktok long en.

Dame Meg i tok mipela i nidim wanpela tempresa gol wantaim mak aninit long 1.5 digri Selses. Mipela i nidim lus na bagarap long stap ol yet, na mipela i nidim liklik na isi fainens bilong klaimet senis.

Olsem Samoa Patwe o rot mep i tok, klaimet senis i bungim ol salens i stap long luksave long sastenebel divelopmen. Nogat eksen bai daunim divelopmen bilong mipela na ol driman na i ken lusim ol kain kain stail kalsa bilong yumi na i no mekim gut long Sastenebel Divelopmen Gol.

‘Ol lida bilong yumi i lukim wanpela banis futsa bilong ol Pasifik ailan pipel i stap long sastenebel divelopmen, menesmen na konsevesen bilong solwara na graun bilong yumi. Mipela i lukluk long futsa bilong mipela na driman olsem ol pikinini bilong yumi bai save olsem ol bilong Pasifik wantaim kain kain samting. Tasol dispela bihain em i stap long bikpela birua nau tasol sapos yumi

mekim mekim eksen nau,’ Dame Meg i tok.

‘Mi laikim yupela long mekim eksen. Helpim ol pipel bilong yumi na rijen long bungim ol toktok long dispela COP na kamap wantaim wanpela agrimen. Ol Pasifik laip, Pasifik kalsa, Pasifik bihain, i stap long han bilong yu,’ Dame Meg i pinisim toktok bilong en long Paris.



Dame Meg toktok long Paris 2015 COP21 konfrens.

UNFPA i opim nupela ripot bilong wol populesen



Walter Mendonca Filho wantaim Minista Delilah Gore i opim nupela ripot bilong dispela yia. Foto: Nicky Bernard

Esther Bralyn Wani i raitim

‘OL meri, ol liklik meri na ol pikinini i nogat strong long taim bilong imejensi na disasta,’ Walter Mendonca Filho i makim UNFPA Papua Niugini i tok.

Dispela em i kisim long het tok bilong Stet bilong wol populesen ripot long dispela yia i tok, ‘Shelter from the Storm- a transformative agenda for women and girls in the crisis on world’.

Mista Filho i tok long ol disasta olsem graun bruk, graun guria, traibel pait we i save kamapim hevi long ol pipel na dispela taim ol meri, liklik meri na ol pikinini i save kisim bikpela bagarap bikos ol i no strong.

Em i tok ol save traim long lusim ples i bagarap na painim gutpela helt sevis, wara, kaikai na ol narapela nid we nogat wanpela famili bai i stap klostu long helpim ol.

‘Mipela i mas redi na ol sevis i mas redi tu long helpim ol pipel i kisim bagarap sapos kain disasta i kamap,’ Mista Filho i tok.

Em i tok tude long wol 60 milien pipel i lusim ples bilong ol bikos long pait i kamap.

Mista Filho i tok, ‘Olgeta de 500 mama na ol yangpela meri i gat bel i dai bikos long ol disasta insait long wol tude.’

Long wankain taim, Minista bilong Rilijen na Yut, Delilah Gore, i tok wankain pasin i kamap long PNG we ol meri na yangpela meri i dai bikos long disasta na i nogat inap sevis long helpim ol long kain taim.

Minista Gore i opim nupela ripot bilong wol populesen.

‘Tis the season to be jolly, What have you planned for this season? **Family feasts, Gifts, Travel Expenses?** Make this **season** merrier with a

BSP PERSONAL LOAN

- ✓ 100% unsecured loan
- ✓ Flexible repayment terms
- ✓ Loan up to K50,000
- ✓ Quick approval

320 1212 / 7030 1212 - 24/7
 servicebsp@bsp.com.pg
 www.bsp.com.pg

Asailum sika givim bel long meri Manus

MEMBA bilong Manus Ronnie Knight i tok wanpela asailum sika man husat i stap long Manus rijonel prosening senta i givim bel long wanpela asples mri long Manus.

Mista Knight i tok dispela pikinini meri em i no mak bilong marit bikos em i mekim Gret 5 i stap long skul na dispela asailum sika i givim bel long em.

Mista Knight i tok ol papa-mama bilong dispela pikinini meri i no bin wanbel long dispela man tasol bihain ol i wanbel gen na tok orait long dispela man i ken maritim dispela pikinini meri.

Mista Knight i no tokaut long wanem kantri stret dispela asailum sika man i kam long en na amas krismas em i gat.

Em i les long tokaut long nem bilong dispela pikinini meri u.

Em i tok dispela asailum sika em i wanpela bilong moa long 600 asailum sika husat i wok long raun long laik long Manus ailan na brukim planti lo bilong PNG.

Em i tok ol asailum sika i wok

long givim bel nating nating long ol meri Manus, dring hombru bia na smuk mariwana wantaim ol asples man.

“Ol asailum sika i wok long kam ausait long banis long 6 kilok moning na ol i wok long go bek long 6 kilok apinun.

“Ol i kam ausait long banis bilong kem na ol i dring hombru bia wantaim ol asples man. Ol ismukim mariwana wantaim ol mangi na ol i wok long givim bel long ol yangpela meri long Manus,”Mista Knight i tok.

Em i tok dispela em i wanpela bikpela hevi we gavman bilong PNG na Australia i mas stretim hariap bikos ol manmeri long Manus i les long dispela kain pasin.

“Mipela i les long dispela kain pasin i kamap. Mipela les long ol asailum sika i stap long ailan bilong mipela. Gavman bilong PNG na Australia i mas rausim ol i go ausait long Manus.

“Ples bilong mipela i liklik ailan na graun i sot. Mipela i nogat inap graun long givim long ol dis-

pela man.

“Mipela i les long ol i kam ausait long banis na bagarapim ol yangpela man na meri. Mipela i les tru long ol long stap long Manus,”Mista Knight i tok.

Manus provinsal polis komanda (PPC) Alex N'Drasal i tok ol dispela asailum sika i wok long kam ausait long banis wantaim sosis, kakaruk, smuk, mit na ol arapela kaikai na ol i wok long givim ol dispela samting long ol asples manmeri.

Mista N'Drasal i tok ol asples man i wok long givim mariwana, hombru bia na stretim toktok long larim ol asailum sika i kisim ol asples meri.

“Dispela samting i kamap long Manus. Mipela (ol polisman) i holim sampela asples man wantaim ol asailum sika taim ol i dring bia na smuk mariwana.

“Mipela i sasim ol asples aninit long lo bilong PNG tasol mipela i hat long sasim ol asailum sika bikos ol i no stap aninit long lo bilong dispela kantri,” Mista N'Drasal i tok.



Asailum sika senta long Manus. Foto: Intanet

Ol skul bai raun lukim LNG

MOA olsem 190 sumatin long 4-pela praimer skul i raunim LNG Plen ausait long Pot Mosbi i gat sans long lukim operesen bilong LNG.

Ol 4-pela praimer skul em Lealea, Boera, Papa na Porebada. Exxon Mobil PNG (EMPNG) i ogenaisim 4-pela raun bilong ol skul bihain long Bot bilong Menesmen (BOM) i karim aut trening.

Ol gret sumatin i raun lukim LNG Plan bikos em i wanpela askim bilong BOM trening we ol i tok em bai mekim ol long skul strong na stadi na strong long skul.

LNG Plent Menesa, Murray Bell i tok olsem

mekim sastenebel benefit long edukesen em i bikpela lukluk long komyuniti invesmen bilong EMPNG.

“Dispela raun bai helpim ol sumatin long save gut long sains, teknologi, ensiniaring, na met we mipela i save promotim insait long Sains Ambaseda program bilong mipela. Insait long EMPNG Sains Ambaseda program ol woklain i save go aut long ol skul long toktok long kainkain sains het tok long givim strong long ol sumatin.”

“Long dispela yia, 17 skul ausait long LNG Plen sait, Hides na Pot Mosbi i stap insait long dispela program, na total olsem 69 Sains Ambaseda i wok bilong EMPNG i go aut na

ranim dispela program,” Mista Bell i tok.

Long wankain taim, het tisa bilong Boera Praimeri skul, John Wasigui i tok kain raun i save givim gutpela tingting long ol pikinini long luksave long ol strong bilong ol long skul na bihain stadi strong long skul.

“Mipela i tok tenkyu long EMPNG na LNG Plent sait tim long larim mipela stap insait long dispela edukesen raun na helpim mipela long skulim ol dispela yangpela het. Mipela i tingting olsem ol sumatin bai go long haus wantaim hangere long lainim samting,” Mista Waigui i tok.

Hagen siti nogat gutpela lidasip

I NO gat gutpela menesmen na strongpela lidasip bilong Mt Hagen siti na dispela i daunim level bilong dispela namba tri siti bilong PNG i go daun.

Pastaim Lot Meya bilong Hagen siti, Jacob Michael, i mekim dispela toktok.

Mista Michael i mekim dispela singaut long las wik taim Praim Minista Peter O'Neill na ol arapela lida bilong kantri i bin go long Mt Hagen long opim nupela teminal bilong Kagamuga ples balus.

Em i tok ol toktok we Mt Hagen siti menesa Pius Pim i bin tokaut olsem ol bisnis haus long Mt Hagen i no bin peim moa long K9 milien, em i no stretpela toktok.

“Olsem wanem na gutpela siti menesa bilong yumi i kirap nogut na tok olsem em i no kisim dispela kain mani? Em i stap long we na toktok i stap? Dispela mani mak em bilong wanpela yia o bilong

hamas yia?” Mista Michael i askim.

Mista Michael i tok taim em i bin stap Lot Meya bilong Mt Hagen siti, ol i bin kisim K16 milien long Nesanel Hausing Kopresen (NHC).

NHC i bin givim dispela mani i go long Mt Hagen siti kaunsil na dispela mani i nap long go long kirapim na larim Mt Hagen i stap gut tru olsem namba tri siti bilong PNG, Mista Michael i tok.

Em i tok pablik na manmeri husat i save stap long siti i mas save long olsem wanem tru ol bot na siti menesmen i yusim dispela mani.

“Mi save olsem siti kaunsil aninit long lukluk bilong siti menesa i bim baim wanpela greda masin na tupela liklik kar ol i kolim kijeng.

“Siti menesa i mas tokaut klia long mipela long olsem wanem em i save yusim ol dispela mani bipo long em i kirap nogut na askim ol

rent mani long ol bisnis haus we em inap long mekim long taim pinis,” em i tok.

Mista Michael i tok Mt Hagen siti i bin ran gut aninit long pastaim menesmen tasol dispela nupela menesmen i no ranim gut siti na dispela i wok long daunim level bilong Mt Hagen.

“Ol manmeri i salim pik long strit, rabis pulap long olgeta hap, ol rot insait long siti i bagarap na raskol pasin i go bikpela. I no gat gutpela menesmen na dispela i wok long kamap,” em i tok.

Mista Michael i tok taim em i bin stap lot meya bilong Mt Hagen siti, em i bin stretim toktok wantaim Boroko Motos na kisim wanpela kar long kisim ol rabis long siti.

Em i tok em i pret long lukim olsem dispela K16 milien we siti menesmen i bin kisim i no inap long kirapim wanpela nupela samting long senisim siti.



Word Publishing Company Ltd

P. O. Box 1962, Boroko, NCD 111, PNG. Tel: (675) 325 2500 Fax: (675) 325 2579
Email: seovo@wantok.com.pg / word@wantok.com.pg

Subscribe for your WANTOK Niuspepa now!!

All you have to do is fill in the form below and arrange for payment and we will dispatch your copy of the WANTOK to you each week. We publish the WANTOK 52 times a year.

AIRMAIL SUBSCRIPTION RATES (includes postage & handling)
PNG K220.00, Australia/New Zealand US\$ 10.00, AsiaPacific US\$150.00
Rest of the World US\$210.00

NCD HOME DELIVERY
K0.80t per copy or K65.00 for two or more copies & Office pickup K52.00 per year for a copy.

Please send me _____ copy/copies of WANTOK for one year.

I enclose Kina/USD _____ as full payment.

Name _____

Postal Address _____

City _____

State/Province _____

(abbreviation)

Country _____ Zip/Postal Code _____

Street Address _____

Telephone _____ Fax _____

Email _____

Signed _____ Date _____

Publisher of



WANTOK
Niuspepa bilong Yumi ol PNG Strit

Today
Monthly English paper

Ramu NiCo trenim wokman

RAMU NiCo Menesmen (MCC) i amamas long sapotim ol wokman bilong en long skil trening long strongim save bilong ol long mekim wok gut.

Las wik kampani i lukim klostu 150 wokman i kisim trening long draivim bikpela masin ol kolim krein na tu, ol arapela trening olsem ges testing masin, besik explosiv trening na skafolding trening. Ol lain husat i pinisim trening i greduet wantaim setifiket.

Vice Presiden bilong Ramu NiCo long Basamak, Xu Jian i tok kampani i save givim moa luksave long ol

wokman bilong en. "Long makim kamap na lukim gutpela risal insait long wok, kampani i nidim ol gutpela save man long wokim wok we i kam aninit long industri standet, na promotim sefti bilong ol wokman meri," Mista Xu tok.

Mista Xu i tokim ol man husat i kisim trenin long kisim dispela save Ramu NiCo i givim bilong helpim ol long wokim kamap gutpela wok long wan wan eria bilong ol.

Wanpela bilong ol wokman husait i kisim dispela traning Charlie Jowia i save wok long weahaus dipamen i tok amamas i go long Ramu NiCo long dispela traning,

Mista Jowia i tok Ramu NiCo i save tingting moa long ol wokman bilong em maski long taim bilong hevi long Nickel pris ol still supotim na helpim ol wokman long kisim gutpela save bilong halvim ol long wok bilong ol.

Ramu NiCo i kisim wanpela PNG kampani ol kolim long Multi Skil Trening Institut i stap long Lae long go givim traning I go long ol wokman meri bilong Ramu NiCo.

Long greduesen i lukim olsem 90 pesen bilong ol wokman husat i kisim trening em ol bilong PNG na kisim setifiket long kinkain skil trening.



Grup foto bilong wok lain husat i stap long trening.

Nupela blok-stua i sanap pinis long Madang



Ol yangpela meri na man i go givim nem long wok long nupela Nu Taun Plaza long Madang. Foto: James G. Kila

James G. Kila raitim

OL MANMERI na pikinini long Nu Taun long Madang i no inap westim taim na mani nau long go olgeta long taun long baime ol samting bikos wanpela nupela bilding wantaim planti seksietua i kamap pinis long Nu Taun.

Nem bilong dispela ol lain stua em "New Town Plaza" na klostu taim bai em op long sevim ol kastoma.

Dispela longpela bilding i stap arere tasol long mein rot klostu tasol long Gospel Laithaus hostel na mausrot bilong Kuperu Strit na Bidamon rot.

Plantilain i guria stret tru long wok ol lain wok-

man bilong Saina i wokim long pinisim dispela longpela bilding kwiktai tru. Tude, dispela longpela bilding i gat 12-pela rum daunbilo na antap.

Sapos ol lain bilong Mosbi i lukim, bai ol i skelim wantaim ol blok stua we i stap long Erima na Godens industrial eria we ol Esia lain i save ranim we i save salim ol samting long daunbilo prais.

Wanpela senia pablik sevana na long-taim papa long Nu Taun, Ivan Mullul i tok dispela plaza bai helpim stret ol komyuniti long Kuperu, Bidamon, Tarangau, Jomba skul eria. Balasigo, Yabob viles, Sisiak, Finsch Road, Miliok, Bemlon,

Talio Street and Kibilak Cresent.

Stat long dispela wik long Mande, planti ol yangpela meri na man i go bringim ol pepa na ol soim ol sekyuriti na ol lain long hap long intres bilong ol long wok long stua. Sampela ol lain ya i go long bik moning tru olsem 6 kilok yet na wet long givim nem.

Mista Mullul i tok lukautu olsem Madang nau yet i gat lo na oda hevi i stap, olsem na ol dispela Esia lain i ronim stua i mas lukluk moa long sait long strongpela sekuriti.

Moa long en tu ol manmeri na ol yut long Nu Taun eria i mas lukautim kain bisnis olsem bikos em i bringim komyuniti sevis long eria.



National Court of Justice CENTRAL PROVINCE

Bench Warrant Call over - National Court Kwikila

9.30 am Friday 11th December 2015

The National Court Criminal Division presided over by **Honorable Justice MOGISH** will be holding a Call Over, of Bench Warrant Issue by the National Court in Waigani since 1999. The purpose of this exercise is to review their status and to give further directions.

If you have been involved in a criminal case as a defendant, a victim or a witness and you are aware that your case has not been resolved you are invited to check with the Central Province Court Crime Registry in order to assist the Court.

You may contact Norm Mega on 324 5766 or nmega@pngjudiciary.gov.pg or Belinda Mwenunuva on 324 5753 or bmwenunuva@pngjudiciary.gov.pg

Dated 9th December 2015



Ian V Augerea
Registrar



National Court of Justice

Bench Warrant Call over - National Court Waigani

9.30 am Thursday 10th December 2015

The National Court Criminal Division presided over by **Honorable Justice MOGISH** will be holding a Call Over, of Bench Warrant Issue by the National Court in Waigani since 1989. The purpose of this exercise is to review their status and to give further directions.

If you have been involved in a criminal case as a defendant, a victim or a witness and you are aware that your case has not been resolved you are advised to check with the Waigani National Court Crime Registry in order to assist the Court.

You may contact Jackson Kalel on 324 5766 or jkalele@pngjudiciary.gov.pg or Belinda Mwenunuva on 324 5753 or bmwenunuva@pngjudiciary.gov.pg

Dated 9th December 2015



Ian V Augerea
Registrar

Goodman Fielder helpim ECPNG ministri

GOODMAN Fielder em i wanpela kampani bilong mekim ol kaikai olsem flawa, tuistis, na wel bilong kuk.

Goodman Fielder i save mekim Flem Flawa, feveret flawa bilong yumi ol manmeri PNG.

Tasol dispela kampani bai nau givim ol flawa na sampela ol kaikai ol yet i save mekim long ol pikinini na ol mama i no gat papa, we Evangelical

Church ov PNG (ECPNG) long Gorobe, Pot Mosbi i lukautim.

ECPNG long Gorobe aninit long wanpela ministri ol i kolim 'ECPNG Hop na Restoresen Ministri Hom Senta' i wok long lukautim moa long 108 pikinini i no gat papamama, ol meri husat i no gat man o man bilong ol i dai pinis, ol singel mama, na sampela ol seks woka.

Pasto Steven Ku-

luka bilong ECPNG sios long Gorobe i tok tenkyu long Goodman Fielder bihain long dispela kampani bilong mekim kaikai i tok orait long givim sampela helpim long ol dispela turangu lain bilong em. Pasto Kuluka i save lukautim ol dispela meri na pikinini wantaim liklik mani em yet i save painim.

"Planti ol dispela meri na pikinini ol bilong Balimo long Westen Provins. Sampela bilong Kerema na

sampela bilong olgeta hap bilong PNG,"Pasto Kuluka i tok.

Tasol Goodman Fielder i nau luksave long dispela gutpela wok ECPNG sios long Gorobe i bin mekim i stap long strong bilong ol yet na aninit long helpim bilong Papa God.

Goodman Fielder bai givim sampela kaikai wantaim sampela helpim long ol dispela tarangu pikinini na mama.

Rot bilong makim Mis Intanet



LONG makim Mis PNG, bilong Bluesky Mis Pasifik Ailan Pejen (MPIP) 2015, Mis Sosol Midia, go long Mis Pasifik Ailan Facebook pes na makim foto

bilong Mis PNG na klikim 'laik'.

Bai ol i bungim ol laik na husat i gat planti laik bai i winim dispela hap.

Voting bai pas long Desemba 12. Long wankain

taim, ol meri i resis long kamap Mis Pasifik Ailan Pejen (MPIP) i go lukim opis bilong Praim Ministra bilong Cook Ailan na opis bilong Turisim. Ekting Praim

Minista na Fainens Minista, Mark Brown na Minista bilong Intanel Afes, Nandie Glassie, i bungim ol yangpela meri long kabinet rum olsem hap awa.

Polye: K100 milien bilong lo na jastis sekta go we?

OPOSISEN Lida Don Polye i askim gavman long tokaut long watpo gavman i katim daun K100 milien bilong lo na jastis sekta.

Mista Polye i tok lo na jastis sekta i save mekim planti gutpela wok long larim ol manmeri, komyuniti na bisnis insait long kantri i stap gut.

"O m b u d s m a n Komisnin, Polis, Kot, na Task Fos Swip i mekim



OPOSISEN Lida Don Polye.

planti gutpela wok long rausim na daunim level bilong pasin korapsen long PNG.

"Taim gavman i katim daun mani mak ol inap long kisim, dispela i soim olsem gavman i laik mekim moa pasin korapsen na em i les long sapatim gutpela wok bilong ol lo na jastis sekta

ogenisesen," Mista Polye i tok.


Mista Polye i askim Praim Ministra Peter O'Neill long rausim K100 milien long ofis bilong Treseri Diptament na givim i go long lo na jastis sekta.

Mista Polye i askim ol manmeri long ridim gut ol buk bilong 2016 Baset na sekim gut hamas mani gavman i givim long ol wan wan diptamen na sekta.

Parkop: UYEP em i gutpela projek

NCD Gavana Powes Parkop i tok Eben Yut Emploimen Projek (UYEP) em i wanpela gutpela projek long larim ol yangpela manmeri long Pot Mosbi siti i gat namba tu sans long laip.

Dispela projek i save kisim ol yangpela manmeri husat i no gat sans long go skul o painim wok mani na i save helpim ol long mekim ol liklik wok.



Eben Yut Emploimen Projek (UYEP) i larim ol yangpela manmeri long Pot Mosbi siti i gat namba tu sans long laip.

Ol yut aninit long

program i save klinim strit, rausim ol pipia na mekim ol arapela wok. Bihain long tupela wik, ol i save kisim fotnait mani.

"Mipela i laikim moa long 70, 000 y a n g p e l a manmeri long Pot Mosbi i kisim wok mani aninit long dispela program.


"Ol pastaim gavman na tu ol gavman dipatmen inap long lukluk long ol yut o yangpela manmeri bilong yumi long kantri i no mekim wanpela gutpela samting," Mista Parkop i tok.

Em i tok tenkyu long Wol Benk, BSP, Digicel na ExxonMobil long sapatim dispela program we NCD i kamapim na ranim Mosbi siti.



Stap Seif wantaim Elektrisiti!

OL NOGUT KRISMAS LAIT



OL GUTPELA KRISMAS LAIT



TOKSAVE BILONG PNG POWER I GO AUT LONG GENERAL PABLIK OLSEM SAMPELA STOA I WOK LONG SALIM OL KRISMAS LAIT WE OL I PUTIM TAMBUN LONG OL.

OL DISPELA LAIT I NOGAT BIKPELA PLASTIK KARAMAP LONG OL NA TU OL PLAK I NO GUTPELA. BAIM TASOL KRISMAS LAIT I GAT OL BIKPELA PLASTIK KARAMAP LONG WAIA NA OL GUTPELA PLAK.

ASKIM OL PAPA BILONG STOA LONG SETIFIKET PEPA I GAT TOK ORAIT BILONG PNG POWER LONG OL KRISMAS LAIT SAPOS YU TINGTING PLANTI.

Plis, ripotim olgeta wari na hevi bilong pawa long 24 hour kol senta long telepon namba 7090800,76535261, 76535272. Email:callcentre@pngpower.com.pg

North Flai kamapim Distrik Developmen Atoriti bod

NOT Flai distrik long Westen Provins i kamapim Distrik Dvelopmen Atoriti (DDA) pinis. Memba bilong Not Flai, Boka Kondra em i kamap interim siaman bilong Not Flai DDA.

Mista Kondra i bin go long lidasip traibunel bihain long kot

i painiamut olsem em i brukim lidasip kod. DDA Act i tok sapos wanpela memba i asua na stap long kot, em bai no inap kamap siaman bilong DDA.

Tasol Ministra bilong Inta Gavman Rilesen na Deputi Praim Ministra Leo

Dion i givim tok orait long Mista Kondra i kamap interim siaman bilong Not Flai DDA bikos ol manmeri i kisim bikpela bagarap taim san i hot nogut tru, ples i drai na level bilong Flai Riva i go daun.

Tasol las wik Mande, Mista Kon-

dra i givim dispela wok bilong kamap ekting DDA siaman i go long Presiden bilong Kiunga Eben LLG, Wilfred Whan.

Ol manmeri i bin bung long ECPNG sios haus lotu long Kiunga na witnesim dispela.

Kondra salensim manmeri long kirapim bisnis

Aja Potabe i raitim

S A S P E N D E D Memba bilong Not Flai, Boka Kondra i tokim ol manmeri long Not Flai distrik long yusim sans we ol ges projek long Not Flai i kamapim long kirapim o nupela bisnis.

Mista Kondra i mekim dispela tok-

tok long las wik Mande long Kiunga taim ol i makim ol bod memba bilong Not Flai Distrik Dvelopmen Atoriti (DDA).

Mista Kondra i salensim ol manmeri olsem bisnis na ikonoms i wok long senisim wol na em i laikim ol manmeri long Not Flai long yusim gut ol sans we

ol ges projek i bringim i kam long kirapim liklik bisnis o SME.

Em i tok edukesen o skul em i wanpela samting ol yangpela manmeri i noken les tasol ol i mas skul gut, kisim save na mekim bisnis long kamapim gutpela sindaun long ples na kantri.

Em i tok planti manmeri i no bin skul gut long taim bipo na dispela i mekim ol risos kampani long paulim ol manmeri.

Mista Kondra i tok ol manmeri i mas yusim gut ol sans we Stenli Ges, P'nyang, Elevala, Umbuntu na Ketu projek long Not Flai i bringim i kam.

Nupela pablik infomesen i mekim isi long glasim mani

WANPELA nupela pablik infomesen program i givim strong long ol komyuniti long glasim gut gavman i yusim mani na luksave olsem ol mani ol i yusim bilong karim aut ol sevis.

Ol i mekim long las yia, dispela 'Sevis na Baset Sata' program bai wok wantaim ol komyuniti long glasim baset bilong gavman egensim ol sevis ol i karim aut.

Hai Komisn Minista Kaunsela bilong Australia, Rod Hilton, i bin toktok long Anti-Korapsen De long Desemba 9 i tok, 'Pablisim ol sevis na baset sata i save helpim ol komyuniti i save na i save glasim ol mani bilong pablik

na holim ol pablik opisa sapos ol i asua. Dispela i save helpim long luksave olsem ol komyuniti i kisim ol sevis ol i laikim.'

Developmen bilong dispela pablik Sata em i kamap long sampela komyuniti konsalten we i gat ol sinia opisa long bikpela nesanel gavman ejensi na provinsal edministresen.

Ol Konsaltativ Implementesen na Monitoring Kaunsil (CIMC) i wok bung wantaim gavman bilong Australia, dispela Sata i save soim ol sevis, ol stendet na ol baset bisev long ol, na soim ol lejisletiv na ol wok bilong ol tu.

Pastaim ol i opim Morobe Len Mediesen Sevis na Baset Sata,

Deputi Sif Mejistret, Mark Pupaka i tok olgeta pipel long PNG i mas save long ol mani gavman i yusim.

'Em i gutpela lista bilong sekim husat i gat wok long kamapim Sata na long wankain taim em i givim wanpela poin long save wanem samting bai kamap. Em bai holim ol opisa long wok bilong ol na mekim ol pipel i tok tru.

Em i bikpela samting long glasim gut na bai mipela i go het long mekim,' Mista Pupaka i tok.

PNG Australia Lo na Jastis Patnasip Trensisen program wantaim CIMC na Koreksanel sevis, Mejisterial sevis, Morobe na Noten provinsal edministresen, viles kot na Led mediesen Seketeriet i kamapim dispela sata.



BAI STOPIM OL PLASTIK BEG LONG NUPELA YIA.

OL plastik beg na plastik bai pinis long nupela yia Janueri 2016. Dispela toktok i kam long Minista bilong Egrikalsa na Laipstok Tommy Tomscol. Em i tok ol dispela plastik i save givim planti hevi long ol solwara, graun na win. Long nupela yia ol bikpela na liklik stoa na maket long Mosbi I mas painim we long helpim ol kastoma bilong ol long yusim ol liklik beg na bilum long putim ol kaikai samting bilong ol. Stop N Shop i gat ol soping beg we ol kastoma I ken baim na putim ol kaikai igo insait. *Poto Stori Nicky Bernard*

EVERY HERO NEEDS A MAMA FLAME

Mothers know it all starts with a full stomach. That's what gives their families the Strength & Energy to win.

Flame
STRENGTH & ENERGY

Flame Plain Flour, Self Raising Flour, Wholemeal Plain Flour

Meri selebretim 40 yia kontribusen long developim kantri

LONG selebretim 40 krismas bilong PNG olsem wanpela nesanel, ol Pablik Sekta Meri long Lidasip Netwok i bin holim wanpela de Pablik Sekta Wimen's Forum long Mosbi long selebretim wok ol meri i mekim

long kontribut long developmen bilong kantri, luksave long ol wok kamap bilong ol meri long ol yia i go pinis na long mekim ol plen long rot we ol meri i ken go fowet long kamap long ol lidasip taget long gavman na

pablik sevis. Het tok bilong forum em "Luksave long ol paionia meri , selebretim ol wok kamap bilong yumi na strongim ol bihain taim meri lida bilong yumi." Poto i soim ol meri i stap long Meri Lidasip bung.



Sampela ol meri lida i toktok.



Ol meri long olgeta sekta bilong gavman, pablik na praivet sekta i harim ol toktok i stap long bung. *Ol Poto: Nicky Bernard*

Diwain Wot i opim Alumnae Pak

EKTING Hai Komisina bilong Australia, Bronte Moules, i joinim Diwain Wot Yunivesiti long opim nupela Alumnae Pak long Madang.

Alumnae Pak i wanpela spes long skul bilong DWU bilong olpela sumatin long bungim narapela na kamapim ol nupela netwok.

Bikpela samting insait long dispela Alumnae Pak em Immortal Wall. Long wanpela yia, taim wanpela narapela kain olpela sumatin long DWU, husat i sapotim humaniti long Papua Niugini o yunivesiti bai i kisim Autstending Alumnae bilong Yia Awat na bai ol i raitim nem bilong en long dispela wol.

'Mi amamas long stap insait long dispela opening bilong Alumnae

Pak. Em i wanpela gutpela inisietiv bai i helpim yunivesiti, ol sumatin na komyuniti,' Mis Moules i tok.

'Diwain Wot yunivesiti i gat strongpela rot bilong wokbung wantaim Australia. Mipela i bin wok bung wantaim long Insentiv Fan na edukesen program bilong mipela. Ol infrastraksa bilong yunivesiti em i wankain olsem ol narapela kantri long wol na i gutpela long ol sumatin long lainim samting.

Ol fasiliti olsem Alumnae Pak i gat bikpela wok long bungim ol sumatin taim ol i greduet pinis we ol i ken wok bung long ol rot i bai helpim ol long ol wok bilong ol na ol komyuniti ol i wok long en,' Mis Moules i tok.

Em i tok dispela em

wanpela gutpela piksa we ol alumni asosiesen i ken sapotim ol memba bilong ol long givim bek long komyuniti. Em i lukim olsem DWU i save rispektim ol sumatin bilong en olsem ol trupela memba bilong bikpela Diwain Wot komyuniti.

'Aninit long Australia Awat program, moa olsem 2000 Papua Niugini i stadi long Australia long 1996 long eria olsem helt, edukesen, infrastraksa na gavanens.

Dispela ol pipel i go bek long PNG wantaim ol rot bilong ol profesenel, ol komyuniti, na ol institusen long Australia. Ol i kam bek long PNG na kisim sapot long PNG Australia Alumni Asosiesen,' Mis Moules i tok.

Nupela fasiliti i mekim gut edukesen long Manus

SAMTING olsem 100 sumatin long Lundret Praimeri Skul long Manus provins bai kisim helpim long ol nupela ol klasrum na toilet aninit long edukesen infrastraksa patnasip namel long gavman bilong Papua Niugini (PNG) na Australia.

Long opim ol nupela fasiliti, Hai Komisina Kaunsela bilong Australia, Sarah De Zoeten i tok, 'Gavman bilong Australia i amamas long wok wantaim gavman bilong PNG na Manus provinsel gavman long helpim na luksave long gutpela edukesen bai kamap long Manus.

'Nupela klasrum, ol haus, wara na fasiliti bilong toilet bai mekim Lundret Praimeri skul i luk

nais long ai bilong ol sumatin na gutpela hap bilong ol tisa long skulim ol pikinini gut.

'Gutpela edukesen i save kamap long ol skul i save gat gutpela fasiliti we i save mekim ol mangi na meri long go long skul na lainim nupela samting na kisim save we ol i ken yusim bihain long laip. Dispela ol fasiliti em ol klasrum, klinpela toilet,' Mis De Zoeten i tok.

Mis De Zoeten i tok, 'Mi save olsem 100 sumatin na sampela ol tisa long Lundret Praimeri skul i kisim helpim pinis long ol dispela nupela senis. Mi bilip olsem ol bai yusim ol dispela fasiliti gut na helpim ol yet na kantri bihain taim.'

Mis De Zoeten i amamas long lukim olsem hap bilong 100 sumatin long Lundret Praimeri em ol liklik meri. Em i tok gutpela skul em i bikpela samting sapos ol liklik meri na yangpela meri i kisim save na painim wok long bihain. Long kamapim bisnis bilong ol yet, kisim lidasip wok long praivet na pablik sekta na komyuniti.

Australia i mekim infrastraksa bilong ol praimer skul long 20 hap long Manus, olsem Bipi, M'buke, Baso, N'dilou, N'yada, Harangan, Lau, Pateku, Metyih, Mouklen, N'drehet, Likum, Metepong, Nohang, Waratalai, Andra, Lomoei, Aua na Wuvulu.

Skul sabsidi bilong Yangoru-Saussia i helpim ol sumatin



Ol 4-pela sumatin meri i kisim basela digri long nening long Pasifik Adventis yunivesiti wantaim sapot bilong Yangoru-Saussia distrik sabsidi.

NAMBA wan teseri skul fi sabsidi skim bilong ol sumatin long Yangoru-Saussia Distrik long Is Sepik i helpim 4-pela sumatin meri long Pasifik Adventis yunivesiti (PAU) long las wik Sande.

Ol 4-pela sumatin i pinis kisim basela digri bilong ol long Nening i amamas long memba bilong ol na Minista bihain. Long Tred na Komes, Richard Maru, husat i bin kamap wantaim dispela sabsidi long helpim ol sumatin long teseri long 2012.

Plantu bilong ol sumatin i amamas long dispela sabsidi we i helpim ol long skul fi na helpim ol papamama bilong ol long ples husat i save kisim helpim long kakau tasol nau binatang i bagarapim.

Ol sumatin i tok Yangoru-Saussia Distrik Di-

velopmen Atoriti aninit long lidasip bilong Minista Maru i mekim gutpela disisen long helpim long skul fi sabsidi bai i developim human risos bilong Distrik long ol yia i kam.

Ol 4-pela nening sumatin bilong Kubalia long Yangoru-Saussia distrik em, Sandra Haffa, Irish Kreng, Sylvia Wukawa na Mary Sungu bai i go bek long distrik long helpim komyuniti bilong ol. Bai ol i stap long ol Helt Post, Helt Senta na haus sik bilong distrik long karim aut ol helt sevis.

Yangoru-Saussia distrik bai sainim wanpela agrimen wantaim 4-pela sumatin long sponsaim ol wantaim ol luksave long helpim distrik.

Komitmen bilong ol long givim bek ol sevis long distrik bai i daunim

ol hevi bilong nogat plantu Helt fasiliti long Yangoru-Saussia distrik we ol pipel i no bin gat inap helt sevis.

Plantu bilong ol helt fasiliti i bruk go daun wantaim ol helt woklain i lusim wok bikos nogat gutpela infrastraksa na fainensel sapot.

Long wankain taim, Minista Maru i makim maus bilong Distrik na tok tenkyu long ol sumatin long pinisim skul gut.

'Bihain bilong ol pipel bilong mipela i stap long ol disisen ol bikman na meri bilong mipela i mekim long go bek na helpim Distrik. Em taim nau olsem yumi senisim dispela pasin bilong yumi Sepik i save painim wok raun long narapela provins.

Mipela i gat plantu Sepik long olgeta hap long Niugini ailan,' Minista

Maru i tok.

Minista Maru i tok, 'Bihain long mi wok olsem Menesing Dairekta bilong Nesenel Developmen Benk (NDB) long 8-pela yia, mi raun insait long kantri na mi lukim olsem plantu sepik i painim wok raun long olgeta hap bilong kantri long dispela mi tingting long go bek long ples na helpim pipel bilong mi.

Tasol olsem lida, mi bai nidim wanpela tim olsem ol nes, tisa, ensinia, polis na ol patna long investa na dona long helpim mi developim na mekim gut laip bilong ol pipel.'

Em i tok em i ken gat ol dispela driman tasol em bai nogat ol profesenel long helpim em long ol dispela we bai hat long karim aut ol sevis olsem helt na edukesen.

NRI i holim woksop long nupela edukesen polisi risets fremwok

NESENEL Risets Institut (NRI) i kamapim nupela Yunivesel Besik Edukesen Risets Polisi Risets Fremwok long harim ol stekholda na bekim ol nid bilong ol data long tokim plening, polisi developmen na givim skul mekim program long kain kain level.

Institut i givim ol bikpela kontribusen i go long edukesen, toktok long eduke-

sen, na prektis insait long Yunivesel Besik Edukesen Risets Program (UBERP) long ol yia i go pinis.

Dispela risets program i bin kamap gut wantaim ol sapot bilong ol narapela stekholda long kamapim 2012 Yunivesel Besik Edukesen Polisi Risets Fremwok. Plantu kain ol nupela risets projek ol i karim aut long givim ol risal long

kamapim ol edukesen polisi na plen, na toktok long besik edukesen diliveri spes.

Ol i rivium dispela risets fremwok long givim wanpela pletfom bilong institut long bekim gut ol data nid bilong Dipatmen bilong Edukesen (DoE) na ol narapela stekholda.

Ol UBERP i kamapim wanpela de stekholda woksop

long kamapim wanpela piksa wok bilong Yunivesel Besik Edukesen Risets Fremwok long Fonde, Disemba 10 long moning.

As bilong dispela woksop em long givim draf Polisi Risets Fremwok na kisim toktok bilong olgeta stekholda. Husat NRI i askim ol long stap insait long dispela bung tasol i ken go.



Ol sumatin long Lundret Praimeri i gat nupela ol skul fasiliti.

BSP bringim Krismas long haus sik

OL pikinini na ol mama long tupela haus sik long Pot Mosbi i bin kisim ol krismas presen i kam long BSP wokman na meri na ol famili bilong ol na dispela pasin i mekim ol sik mama na pikinini i amamas tru.

Long Sande Desemba 6, BSP tim i pulimapim tru ol gutpela samting bilong Krismas amamas na i go long Neseri bilong Pot Mosbi Jeneral Haus Sik long givim sampela dispela presen long ol sik pikinini long hap.

Bihain ol i go moa long lukim ol sik mama na ol pikinini long Sen Johns Gerehu Haus sik.

Long tupela hap wantaim em ol sik pikinini na ol mama i amamas tru long lukim tim bilong BSP wantaim helpim bilong wanpela Santa Klaus. Long Pot Mosbi Jeneral Haus sik ol i givim aut ol dapiapa o plastik napkin, bebi milk, pepa taol na wara purifaia miksa, ol sop na toilet pepa na wantaim ol balun na ol samting i gat kala na nem bilong BSP yet.

Long Gerehu, ol arapela

samting long paket bilong ol pikinini i bin gat ol marasin bilong han, wanpela sof dring na bisket wantaim BSP siot, stres bal na ol aiglas na ambrela.

Benk Kopret Sponsasip Menesa Rosemary Mawe i tok klia long lukluk raun olsem BSP i sapotim na ol wokman na wokmeri i givim taim bilong ol yet.

“Raun long haus sik em i hap wok bilong Koporet Sosel Risponsibiliti bilong benk na em i olsem gutpela samting moa antap long planti gupela sevis insait long yia long ol gutpela sponsasip, donesen na ol wok we benk i save mekim insait long komyniti,” Mis Mawe i tok.

Ol BSP wokman na meri husat i bin volantia long stap insait long dispela wok i tok, ol i pilim gutpela tru long mekim kain wok olsem.

Tina Pomat husat i helpim long redim dispela raun i tok, “Mipela gat sans long serim Krismas spirit bilong laikim, amamas nab el isi na mekim ol i smail bikos ol bai i no



BSP wokman na meri wantaim ol famili bilong ol na Santa i go long Sen Johns Haus sik, Gerehu,

BSP wokman na meri wantaim ol famili na Santa i go long bebi neseri long Pot Mosbi Jeneral Haus sik.

inap long stap wantaim famili long taim bilong krismas.”

BSP wokman na meri long Kokopo na Rabaul tu i go lukim ol siklain long Vunapope na Nonga Beis Haus sik. BSP tim long Lae bai holim wankain wok long Desemba 26.



Yusim gut mani bilong TB

PASTAIM Praim Minista, Sir Mekere Morauta i tokaut long dispela wik olsem gavman i mas yusim gut mani bilong rausim sik Tubekulosis (TB) long tripela hotspot, em ol ples we sik TB i kamap bikpela long hariap, olsem ol i bin tok promis 6-pela yia i go pinis.

Em i sutim tok long nesenenel gavman wantaim Flai River Provinsal Gavman long ol i mas putim K140 milien tok promis mani bilong daunim sik TB long Westen, Galp na Sentral provins nau bikos dispela

em ol tripela hotspot bilong sik TB.

“Sapos Nesenenel Helt Dipatmen wantaim Provinsal Helt na ol NGO na eid ejensi i laik stopim TB long go moa yet, ol i mas givim marasin long ol sik lain nau yet,” Sir Mekere i tok.

Sir Mekere i tok, Kabinet i tok orait long dispela mani 6-pela mun i go pinis tasol em i no kamap ples klia yet. “Ol pipel i wok long dai yet na moa i stap long birua bilong kisim sik TB klostu, klostu,” em i tok.

Sir Mekere i makim tok i bin kamap long Nesenenel Dipatmen ov Helt na Wol Helt

Ogenaisesen olsem:

“Hevi bilong TB insait long kantri na moa long MDR-TB long tripela hotspot em Nesenenel Kapital Distrik, Daru na Galp em i bringim bikpela wari tru,” Mista Morauta i tok.

MDR-TB em strongpela kain sik TB we i save kamap long ol sikman na meri husat i no save pinisim gut ol marasin bilong ol long namba wan taim na taim ol i kisim gen em sik i no save pinis wantaim ol marasin bilong TB na planti sikmanmeri na pikinini i save dai long dispela sik.

PNG UNRC Sapot long daunim HIV

I GAT 32,000 manmeri nau i stap wantaim binatang bilong HIV long Papua Niugini tasol ol atoriti i tok, dispela bai i no trupela namba bikos planti lain i gat binatang tasol ol i no save bikos ol i no sekim blut bilong ol.

UN Residen Kodineta long Papua Niugini, Roy Trivedy, long Wol HIV/AIDS de, i singaut long olgeta lain long ol i mas save long mak bilong HIV long laip bilong ol, olsem na ol i mas gona sekim blut o kisim tes.

Sapos tes i soim olsem ol i gat, em ol i mas kisim marasin na stap longpela taim olsem ol narapela lain nau i stap strong bikos long gutpela wok kantri bilong ol i mekim.

Singaut bilong UN long ol patna i mekim wok strong na tu long ol pipel yet i mas lukautim ol yet long sekim blut na kisim marasin.

Mista Trivedy i tok, ol ripot i soim olsem hap namba bilong ol pipel long PNG

husat i gat binatang em i wok long go daun.

“Taim namba bilong ol nupela lain i kisim sik HIV/AIDs i go daun em i soim olsem hevi bilong dispela sik i wok long go daun tasol em i no min olsem birua bilong ol man na meri i kisim binatang em i pinis, na i no min olsem HIV em i no bikpela hevi long PNG nau,” em i tok.

Mista Trivedy i tok olsem bikos long Pasifik 70 pesen bilong ol pipel i stap long PNG tasol long PNG moa long 95 pesen bilong populesen i gat binatang bilong HIV.

“Kantri i gat bikpela mak bilong ol nupela lain i kisim sik HIV long Pasifik, olsem na yumi mas stap strong yet na gavman i mas mekim moa wok yet wantaim ol developmen patna na ol praivet sekta, ol komyniti na wan wan man na meri long lainim ol narapela long pasin bilong lukautim ol yet

long HIV, kisim tritmen, na stap fri long pasin bilong stigma na diskriminesen.

“Long Papua Niugini, wankain olsem long ol narapela kantri, holim wok na strongim wok bilong daunim sik HIV bai kamap sapos i gat ol invesmen i stap yet wantiam gutpela na klia program we inap long helpim stret ol lain husat i save stap long kain laip we ol i nap long kisim binatang bilong sik isi tru,” em i tok.

Mista Trivedy i tok Papua Niugini i gat program bilong givim fri marasin bilong HIV (ART) tasol tasol em i mas go bkpela moa long luksave na givim marasin na lukautim ol lain husat i stap wantaim HIV. Em i tok olgeta Papua Niugini husat i gat HIV i gat rait long kisim antiretroviral tritmen o marasin bilong HIV long stap strong na helt long mekim wok bilong sosaiti na long helpim long stopim nupela lain long kisim binatang.

MRDC Sapotim ‘Helti Mama, Helti Bebi’



Helti bebi

MINERAL Risos Developmen Kampani (MRDC) em i bungim moa ogenaisesen na ol wan wan lain long sapotim ol medikal risets long daunim mak bilong ol mama na bebi i save dai long taim bilong karim bebi, insait long kantri.

Long las wik kampani i bin givim K100, 000 i go long Burnet Institute long sapotim Helti Mama na Helti Bebi Program bilong en.

Institiut i wok long ranim namba wan hap bilong wanpela 5-yia program long Kokopo, Is Nu Briten we Profesa James Beeson na wanpela medikal na pablik helt risets tim long PNG na Australia i wok long en.

Em i wanpela bilong ol 5-

pela integreded stadi bilong institiut, na Profesa Beeson wantaim tim bilong em i wok long painim 700 meri na bai ol i bihainim taim bilong ol i kisim bel i go inap long taim ol bai karim bebi.

Na 12-pela mun bihain long ol i karim bebi, ol bai luksave long wanem kain ol hevi i save kamapim dai na bagarap long bodi bilong ol mama na bebi.

Taim ol i luksave long dispela, bai i gat ol helt intevensen i kamap long traime ol rot bilong helpim ol mama na pikinini long taim bilong bel na karim olsem bai ol i traime daunim namba bilong ol dai i save kamap long dispela kain taim.

Menesing Dairekta bilong MRDC, Augustine Mano i tok kampani i amamas long sapotim program na gutpela wok bilong Burnet Institiut bikos em i luksave olsem PNG i gat bikpela namba tru long ol mama na pikinini i dai long taim bilong karim bebi.

“Ol dispela liklik bebi tru em bai holim kantri long bihain na long ol i gat gutpela helti laip bihain taim, yumi mas mekim olgeta wok long helpim ol mama bilong ol husat i givim laip long ol taim ol i liklik yet na i no gat strong long helpim ol yet,” Mista Mano i tok.

Sampela stetistikis o namba bilong hevi long PNG olsem ol meri long PNG i gat 80 taim moa sans long dai long taim bilong karim bebi winim wanpela wankain meri long Australia. Moa long 5000 bebi bai dai insait long namba wan mun bilong laip bilong ol na 7000 moa bai dai pastaim long ol i kisim 5-pela krismas.

Burnet Institiut Dairekta na CEO, Profesa Brendan Crabb AC i tok tenkyu long MRDC long sapot bilong ol na i tok, olsem ol Helti Mama, Helti Bebi em i wanpela bikela samting long risets program ol i bin wokim long senisim helt bilong ol meri na pikinini long Papua Niugini.

BSP woklain i givim amamas bilong Krismas long ol sik meri na pikinini

OL sik bebi, pikinini na ol mama long tupela haus sik long Pot Mosbi i kisim Krismas presen na ol BSP woklain na ol famili bilong ol amamasim ol.

Long Sande Desemba 6, dispela BSP tim i karim ol presen na raun lukim ol Nseri long Pot Mosbi Jenerel Haus sik. Bihain long dis-

pela ol i go na lukim ol mama na pikinini long Sent Johns Jenerel Haus sik.

Ol sik mama na pikinini long tupela haus sik wantaim i amamas long lukim ol BSP woklain wantaim wanpela papa krismas o senta. Long Pot Jenerel Haus sik ol i givim ol bambam, milk bilong bebi, ol pepa tawel, ol wara purifaia

miksa, ol samting bilong yusim long toilet na ol samting bilong BSP na balun tu.

Long Gerehu, ol i givim ol samting bilong wasim han, dring, kuki wantaim BSP set, ol bal, ai glas na ol ambrela.

Benk Kopret Sponsasip Menesa, Rosemary Mawe, i tok BSP i sapotim dispela raun taim ol

woklain i givim taim bilong ol long raun.

'Dispela raun long ol haus sik em i hap wok bilong Kopret Sosal Risponsibiliti bilong Benk na dispela em Benk i save pinisim long olgeta yia,' Mis Mawe i tok.

Long wankain taim, wokmeri bilong BSP Tina Pomat i tok, 'Mipela

i serim Krismas spirit bilong laik pasin, amamas na wanbel pasin na putim smail long ol pipel husat i nogat sans long stap wantaim ol famili bilong ol long Krismas.'

BSP tim long Kokopo na Rabaul i raun lukim Vunapope na Nonga Bes Haus sik. Long Lae bai ol i karim aut long Desemba 26.

Bosmeri bilong CSIC tokaut long wokim gut wok long PMIZ

James G. Kila i raitim

PRESIDEN bilong China Shenyang Intanesinol Korpresin (PNG) Limited, Tang Li Zhen i tokaut olsem kampani bilong em bai wokim gutpela wok long kamapim ol bilding bilong Pasifik Marin Industrial Zon (PMIZ) long Madang provins. Dispela meri presiden bilong bikpela kontraksen kampani husat bai wokim ol bikpela

ilding bilong PMIZ long Vidar long not kos rot long Madang, i tokaut fran long Praim Minista bilong PNG, Peter O'Neill olsem kampani bilong em bai pinisim wok long taim ol i makim long en stret. Bosmeri ya i bekim salens i kam long Am-baseda bilong China i kam long PNG Li Ruiyu olsem CSIC i mas wokim gutpela wok long PMIZ. Olsem na

bosmeri Zhen bilong CSIM i tokaut olsem kampani bilong em bai bringim kamapim gutpela wok long mani mak na gutpela kwaliti we klaint bai amamas long en. Namba wan hap wok bilong kontraksen bilong PMIZ bai kos US\$ 95milien, we long PNG Kina em olsem K287 milien, na dispelamani ikam long Exim Benk bilong China. CSIC bosmeri

ya i bihainim lek-mak bilong arapela strongpela meri husat em namba wan Siameri bilong Ramu NiCo Menesmen. Nem bilong em Madam Luo Shu, na dispela strongpela meri i namba wan meri long go pas long stretim rot wantaim PNG gavman na na ol stekholda na ol as-ples pipel long kirapim Ramu NiCo Projek long Gavana bilong Madang, Jim Kas i tok bikpela tenkyu i go long PM O'Neill na Minista bilong Tred, Komes na Industri, Richard Maru long strongpela sapot blong ol long long kirapim dispela PMIZ projek long Madang. Mista Kas i makim ol pipel bilong Madang na i givim tupela pig na tupela muruk olsem kastom presen i go long Praim Minista Peter O'Neill.



Presiden bilong CSIC kontraksen kampani bilong PMIZ i sekan long Gavana bilong Madang, Jim Kas long taim bilong lonsing bilong projek. Foto: James G.Kila

Rot projek bilong ol meri Buka

INSAIT long 20 de human rait ektivisim bilong Papua Niugini (PNG), ol meri long Bogenvil i lukluk long bikpela wok bilong ol long kamapim 100 kilomita rot long rijen na bekim bilong wok long laip bilong ol.

Gavman bilong Australia i wok bung wantaim Atonomas Rijen bilong Bogenvil (AROB) na kisim olsem tausen meri long ol rot projek insait long Komyuniti Wok Agrimen.

Dispela agrimen bai kisim ol lokal komyuniti long ol bikpela wok olsem katim gras, klinim baret na ol stretim ol liklik bagarap i kamap long rot.

Not Bogenvil Komyuniti Laiason Opisa, Rhonda Siro, i tok klia olsem dispela i mekim ol as ples amamas long hap bilong rot ol i wok long en.

'Ol tim i wok long rot i rispektim dispela komyuniti agrimen na mani ol i kisim. Ol i gat



Ol tim lida bilong rot projek; Veronica, Rhonda na Anna.

strongpela tingting long lukautim dispela bikpela rot we i save kisim ikononik na sosal helpim i go long ailan,' Mis Siro i tok.

Em i tok ol meri i wok olsem tim lida long Not Bogenvil i tokim em olsem dispela wok na mani i givim ol strong na gat maus long komyuniti.

Wanpela bilong ol lida, Veronica Tasin, i lukim planti kain kain helpim long dispela program na lukim ol senis i kamap long komyuniti.

'Mani long dispela

wok i givim mi sans long baim skul fi na baim ol liklik samting we famili bilong mi i nidim,' Veronica i tok.

Long wankain taim, tim lida Anna Vatoro i mekim wankain tok olsem dispela wok i givim strong long ol meri long komyuniti bilong en husat i no save gat inap rot long mekim mani.

'Mi amamas long kamap wanpela tim lida. Dispela wok i gat bikpela luksave na bikpela rispek long en.

Ol meri long tim bilong mi i save wok hat tru na lukautim rot long helpim ol pipel bilong Bogenvil.

Dispela wok i strongim ol meri long komyuniti.

Long wok bung wantaim Atonomas Rijen bilong Bogenvil, Australia Aid Program i givim mani long stretim olsem 400 kilomita long rot bilong Bogenvil long wan wan yia insait long Trensport Sekta Sapot Program (TSSP).

OTML i stap insait long kempen bilong GBV

OL menesmen na woklain bilong Ok Tedi Maining (OTML) i bung long Sarere long 5 Desemba long makim 16 de ektivisim bilong Yunaitet Nesen egensim Jenda Bes Vailens (GBV) - 'Orange the World' kempen.

Menesing Dairekta na Sif Eksekutiv Opisa (CEO), Peter Graham i tok vailens em i nogut pasin na askim ol man long gat rispek long ol meri na ol liklik meri.

'Ol meri na ol liklik meri ol i naispela na ol i mas rispektim ol. Mipela i mas stopim dispela kain nogut pasin we i save bagarapim wanpela meri insait long

tripela meri long wol,' Mista Graham i tok. Mista Graham i tok taim mipela i lukim ol hevi i kamap long vailens, em i no gutpela samting taim planti bilong ol i stap ausait long lo.

Em i tok domestik vailens i no save givim hevi long ol meri tasol long ol pikinini tu.

'Em i wari olsem ol dispela piksa bai stap wantaim ol pikinini husat i lukim kain pasin, na vailens i bai go het olsem em orait long narapela jenere-sen,' Mista Graham i tok.

Mista Graham i tok dispela de OTML i soim olsem ol i laik wok bung long

mekim wanpela senis na stopim vailens egensim ol meri.

'Dispela so bilong sanap wantaim we ol woklain bilong OTML na ol narapela bisnis patna em i impoten long strongim dispela toktok. Ol kain pasin i mas senis. Mipela i mas mekim klia olsem ol trupela man i no save paitim meri,' Mista Graham i tok.

Em i tok moa olsem OTML bai wok strong long sapot long ol lokal komyuniti na mekim komitmen long go het long mekim kempen na stopim vailens egensim ol meri na ol liklik meri.



Ol woklain bilong OTML na ol kontrakta patna i wok bung long stopim vailens.

Katolik sios i givim K300, 000 long draut

Esther Bralyn Wani i raitim

KATOLIK sios i givim K300, 000 long sapotim ol pipel i kisim bagarap long draut o strongpela san bihain long ol i mekim asesmen.

Jenerel Seketeri bilong Katolik Bisop Konprens, Pater

Victor Roche, i tok aut long dispela bihain long Caritas PNG na Caritas Australia i bin mekim wanpela wok painim aut long dispela hevi bilong fros o ais i bin pundaun na long helpim ol pipel long Hailans rijen.

Pater Roche i tok ol man i

makim 4-pela Katolik daisos i kamap wantaim ol ripot bilong ol na givim ol proposal long mekim longpela plen.

Long wankain taim, Nesenel Dairekta bilong Caritas PNG, Raymond Ton i tok, 'Long stat bilong Septemba, Caritas PNG na Australia i givim namba wan rilif kaikai

long samting olsem 10,000 famili.'

Mista Ton i tok namba tu raun bai stat neks yia long Mas na Epril.

Em i askim ol pipel long tingim ol husat i sik, lekhan i nogut na ol pipel i no inap long helpim ol yet bipo ol i tingim ol



Marit long sem seks- Hap namba 4

ORAIT, yumi go bek long Buk Stat 2.15-25 na lukim tok tru bilong sem seks i stap long we?

Long Buk Stat 1.26 i tok, Bihain God i tok olsem, "Nau yumi wokim na manmeri bai ol i kamap olsem yumi yet.

Orait, God i wokim ol manmeri na ol i kamap olsem God yet

God i mekim ol i kamap man na meri na mekim gutpela tok bilong givim strong long ol.

Orait, namba wan samting God i wokim man na givim laip bilong em yet long man na man i stap wanpis. Long ves 16 Bikpela i tok olsem, Em i no gutpela long dispela man i stap wanpis.

Mi mas mekim kamap poroman bilong helpim em. Orait, ves 21-25 i stori long rot we God i mekim meri i kamap poroman tu bilong man. Long hia yumi lukim olsem God i kisim bun na mit bilong man stret na mekim meri. i luk olsem strong bilong man i stap long meri na meri i kisim strong bilong em long man. Laip bilong man i stap long meri na laip bilong meri i stap long man.

God i mekim man long graun na em i winim win na givim laip bilong em yet long man.

Wankain olsem, God i kisim bun na mit bilong man na givim laip long meri.

Long dispela , tupela i kamap poroman meri tru na taim tupela i bung, tupela i kamap wanpela bodi stret.

Bipo, God Bikpela i mekim man, Bikpela i tokaut long plen bilong em.

Gen 1: 26 tok long man na meri na kamap planti na sindaun long olgeta hap long graun. Nau yumi kisim klia skul olsem man na meri.

Em min olsem, taim man i stap wantaim meri, meri inap karim pikinini na em i tru.

Em God Bikpela i plenim na disainim marit long dispela wanpela rot tasol.

Samting God i plenim na kamapim man bai no ken brukim. Wetim dai tasol bai brukim tupela, tasol ol pikinini man na meri bai ol i skruim yet long inapim plen na tingting bilong Bikpela.

Tru, tumas save bilong man i laik marit long tupela man yet na tupela meri yet, em bai olsem wanem?

Long dispela tingting ol arapela kantri ol i kamapim pinis, tasol yumi PNG bai hat stret.

Long pasin kastom bilong yumi bai hat tru long lukim dispela kain lain long i stap insait long komyuniti bilong yumi.

Em bai i gat pasin sem na em bai kamapim hevi long famili bilong dispela ol manmeri.

Tru dispela pasin, em i no pasin kastom bilong yumi na tu em i no plen bilong Bikpela.

Kastom bilong yumi bai ken tok olsem.

Em pasin bilong dok na pik, tasol dispela, tokples i no inap kamap gut. Lenguis yumi bai yusim em, wits o sanguma.

Em rait lenguis long metsim satan. Olsem na ol palamen memba i mas go bek long wanem ilektoret bilong ol yet na glasim dispela pasin bilong sem seks i stap bipo tu o nogat. Sapos nogat rait ol i no ken suvim het bilong ol long bagarapim plen bilong God.

Em nau, Buk Tambu i tok pinis olsem man na meri em inapim stret pasin bilong marit na em i tokaut long yumi olsem man na man na meri na meri.

Pot Mosbi Katolik Asdaiosis i gat nupela opis

Veronica Hatutasi i raitim

OL KATOLIK Sios memba insait long Pot Mosbi Asdaiosis nau i ken amamas long gat wanpela sentrel opis we ol i ken go long en bihain ol i opim nupela Sanseri hetkwata bilding bilong ol.

Samting olsem 400 Katolik manmeri insait long 14-pela peris long Pot Mosbi Asdaiosis i bin bung long 4 Mail Loretto hap we nupela opis bilding i sanap long en long stap insait long tupela de amamas na selebresen na lotu long makim dispela de.

Asbisop John Ribat i tok dispela em i histori insait long Katolik Asdaiosis long gat wanpela sentrel opis bai gat ol wan wan opis na ol woklain i wok long ol.

Em i tok tupela stori bilding i gat long em opis bilong Asbisop yet, edukesen, helt, yut, marit na famili laip, Caritas PNG, Katolik Buksop, pastorel, mama grup, lijon ov Mary, konprens rum na moa.

"Nupela hetkwata bilding bai yunaitim yumi wantaim bikos ol opis i stap hia nau na bai sevim taim, wok bai ran na kamap gut. Na bikpela tok tenkyu i go long ol dona na poroman bilong yumi long Gemeni, Sir Henry Chau na famili na ol arapela moa na ol peris insait long Asdaiosis,"



Pater Rodrigo em bosman bilong nupela Sanseri i holim buk we i gat prea long blesim nupela bilding. Sanap long sait em bosman bilong SVS, Hidezhe Hanasi na meri bilong em, na long narapela sait em Adrian Chau na meri bilong em bilong Lae Biskit kampani. Ol Foto: Julimark Z Castaneda

Asbisop Ribat i tok.

Em i tok ol wan wan daisios long Pot Mosbi i bin putim K5,000 olsem kontibusen bilong ol long sanapim nupela hetkwata bilding bilong ol.

Total manimak long sanapim nupela bilding em K4 milien na Zenith Konstraksen kampani i bin wokim bilding ya.

Asbisop Ribat i plen long kamapim nupela asdaiosis hetkwata i bin stat long yia 2007 we ol i bin lukim olsem i gat nid long gat wanpela sentrel ples o hetkwata long mekim ol wok wantaim, na ol i statim ol fan

resing long projek.

Liklik histori long rot we Pot Mosbi Asdaiosis i kamap long en em, Pot Mosbi i bin stap aninit long Bereina Daisios we i gat 125 krismas nau.

Tasol long yia 1966, ol i bin kirapim Pot Mosbi Asdaiosis na i kam inap nau, asdaiosis i gat 5-pela lidaman o bisop.

Namba wan em Asbisop Vigil Corpas bilong kantri Australia, namba tu em Herman ToPaivu bilong Is Nu Briten, namba tri em Asbisop Peter Kurongku bilong Bogenvil, namba 4 em Asbisop Brian Barnes bilong Australia na

namba 6 em nau lidaman, Asbisop John Ribat bilong Is Nu Briten.

Asbisop Ribat i tok long dispela nupela bilding, i gat 20-pela "pole" o diwai i gat ol painting na ol drowing, na ol i makim ol 20 provins na ol kalsa long PNG.

Em i tok wok long sanapim dispela nupela opis bilding i no isipela wok, tasol wantaim hatwok bilong olgeta, samting i kamap we sios i ken amamas long en.

Stat long las wik, ol opis i lusim olpela opis long Dove Travels ples long Boroko na muv i go long nupela opis.



Opim nupela Senseri bildin.



Long taim bilong lotu long opim nupela opis.



KOMENTRI

Manus Ailan i no stap stret

LIKLIK ailan bilong Manus em i no moa liklik. Wol i luksave pinis olsem em i wanpela biknem ples insait long kantri Papua Niugini we ol refiuji o asailum sika manmeri i kam long Midel Is o Saut Esia i stap.

Manus Ailan i bin mekim nem taim wanpela asailum sika i kam long kantri Iran i bin dai las yia. Reza Barati bilong Iran i bin lusim laip las yia long han bilong ol sampela man.

I no dispela tasol. Nau yet planti samting i no stap stret. Memba bilong Manus Ronnie Knight i tok planti samting i no stret long liklik ailan bilong Manus.


Em i tok ol asailum sika i nau kisim sampela liklik fridom. Ol asailum sika husat i stap insait long banis i wok long kam ausait long banis na i wok long mekim nabaut nabaut long laik bilong ol yet.

Ol i smukim mariwana long laik bilong ol yet. Ol dring stim na hombru bia wantaim ol asples man.

Na tu Mista Knight i tokaut tu olsem wanpela asailum sika man i givim bel pinis long wanpela asples pikinini meri.

Dispela pikinini meri i mekim Gret 5 long praimer skul. Memba Knight i les long kolim nem bilong en. Tasol em i tok krismas bilong dispela pikinini meri i no stap long mak bilong marit.

Glasim gut sindaun long Manus Ailan..



Tasol em i gat bel pinis. Papa bilong dispela pikinini i stap insait long bel em i dispela refiuji man. Ol famili bilong dispela meri i les long dispela man tasol

bihain ol i pilim sori na wanbel gen.

Mista Knight i tok liklik Manus ailan i pulap long ol kainkain samting i kam long Australia. Ol

smuk, kaikai, na ol arapela samting i kam long Australia i pulap long ol liklik maket arere long Lorengau taun na klostu long Lombrum bes.

Dispela em i gutpela tasol yumi no save sapos ol dispela samting i gutpela samting long bodi na laip bilong manmeri o nogat.

Ol kampani husat i wok long kisim ol dispela samting i kam insait long Manus tu i abrusim ol rot we gavman inap long kisim takis mani.

I no dispela tasol. Memba Knight i singautim gavman long save olsem ol rabis na pipia bilong dispela prosesing senta i wok long bagarapim wara we ol manmeri i save dring. Nau em i taim bilong drai weda na planti manmeri i nidim wara.

Tasol Knight i tok wanpela ol rabis na pipia bilong dispela kem i wok long bagarapim ples. Dispela i ken kamapim kaikain sik na manmeri i ken kisim bikpela

bagarap.

Manus em i wanpela ples insait long PNG we neval bes bilong PNG Difens Fos i stap. Mista Knight i tok ol sekyuriti bilong rijnel prosesing senta i save go kam insait long ples bilong ami.

Ples bilong ami em i ples bilong ami! I no gat wanpela man o meri i mas i go insait na lukim ol samting i stap insait.

Ol PNGDF ami yet i mas lukautim na stap bikos em i nesenel sekyuriti bilong yumi olgeta.

Tasol Komanda bilong PNGDF Gilbert Toropo i tok ol ami yet i save lukautim dispela ples. Sapos Brig-Gen Toropo i tok tru, em i gutpela tru. Larim ol ami yet i lukautim dispela ples.

Ol ausait man, ol asailum sika, ol arapela man nating, na ol sekyuriti kampani i noken yusim ol samting bilong PNGDF.

Mista Knight i tok tu olsem graun long Manus i sot. Manus em i liklik ailan.

Em i no gat bikpela graun. Tasol ol dispela asailum sika bai stap we?

Nogut sampela i stap maritim meri Manus na i stap long hap. Knight i wari tru olsem pasin Manus bai lus olgeta sapos ol dispela refiuji man i stap long Manus.

PNG gavman i mas mekim wanpela gutpela samting long stretim ol dispela hevi. Gavman i mas stretim dispela hariap.

Gutpela Katolik sios makim 2016 Yia bilong Marimari



GOD husat i wokim heven na graun na olgeta samting i stap long em i God bilong kros na bagarapim ol samting.

Manmeri i save pret long belhat na strong bilong em.

Ol i save long pasin bilong em taim ol i ritim ol stori long buk Baibel stat long taim bilong Noah i kam inap long taim Jisas i kamap man.

Nogat wanpela man inap pasim God taim em i kros na bagarapim ol samting. No gat.

Tasol yumi i save tu olsem God i God bilong marimari. Dispela em taim Jisas Krai i dai long dawai kros na kirap bek long matmat.

Em i mekim long skulim ol manmeri long go bek long em, harim tok, onaim na presim em.

Dispela i soim God i God bilong marimari.

Long dispela asyumi i amamas olsem Katolik Sios i makim 2016 Yia bilong Marimari. Dispela yia i stap long Tunde 12 Disemba na pinis long Novemba, 2016.

Kain tingting i tokim ol manmeri olsem sapos ol manmeri i asua ol no ken ting ol i lus olgeta. God pasim rot bilong ol long go long em. Nogat. Ol inap sapos ol i tok luksave, tanim bel, tok sori na i no mekim get pasin nogut bilong ol.

Jisas i go bek long papa bilong em na em wok bilong sios long tokaut long marimari bilong God.

Sios i mekim stret taim em i makim 2016 Yia bilong Marimari long tokaut long wanpela pasin bilong God.

Insait long Katolik sios i bin gat planti man husat i kamap Pop na ol strongim ol skul bilong Sios; sampela i strong tru bihainim loa bilong tumbuna na sampela i laik lukim senis bihain sindaun bilong manmeri we i gat long nau.

Dispela Pop Francis nau Katolik sios i gat i laik lukim ol senis long loa bilong sios we i bihainim kain stap ol manmeri i gat long em.

Stap bilong nau i no olsem stap bilong ol manmeri long 1960s, 1900s, 1800s o pas-taim long dispela.

Loa bilong pasim manmeri long kilim bebi long bel bilong mama (abortion), brukim marit, kilim man na ol arapela loa moa.

Planti ol dispela asua em Katoli sios oltaim i save i tok em i rong long kilim bebi long bilum, manmeri i mekim God i no inap long pogim em.

Tasol em i no save sapos pikinini i kamap bihainim reip pasin, o laip bilong mama i lus sapos pikinini i stap long bel

bilong mama, o sapos wanpela i kilim narapela taim em i save laip bilong em bai lus taim birua em i no pasim birua.

O marit i bruk bikos pasin bilong papa o mama i bagarapim family laip.

Olgeta dispela samting sios i mas luksave bipo long em i tok em i asua tru na olsem God i no inap long pogivim rong bilong ol.

Francis nau i laik tok nogat. I gat sampela bikpela asua i stap na manmeri i mekim wanem samting ol i mas mekim long em. Long dispela as sios i mas skelim gut tingting bipo long em i tok nogat o yes long ol.

Pop Francis yet i tok: "Mi husat bai mi sutim tok." Em i min God wanpela tasol bait ok sapos manmeri i rong o nogat. I no man i tokim narapela man olsem em i rong. Larim God yet i skelim.

Mipela i amamas long tingting bilong Pop i makim 2016 Yia bilong Marimari.



Published Weekly, Thursday, for Word Publishing Company, Ltd.

P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



Wantok i helpim gut ol ples lain

PLANTI grasrut long ples i save lukluk long sios olsem ples we ol i ken kisim sevis long en.

Long ol ples longwe, peris na ol autstesen em ol hap we pipel i save go long kisim ol sevis olsem helt, skul, lotu na ol arapela sevis moa.

Ol rot bilong komyunikesen tu we ol pipel i kisim save long ol samting i kamap long kantri, wol, na ol nius long edukesen, helt, sios na ol narapela moa olsem niuspepa, redio na TV i bikpela samting.

Malmal viles i wanpela ples long Madang na em i wanpela autstesen bilong Madang Katolik Peris we i kam aninit long lukaut bilong Pater Janusz Skotniczny SVD.

Foapela poto i soim ol bikpela manmeri na pikinini i amamas long ritim Wantok Niuspepa na kisim save bikos save na rit na rait i pawa we i ken kamapim senis insait long laip bilong wan wan man meri na pikinini, famili, komyuniti na kantri.

Poto 1 i soim wanpela bikpela man bilong ples Malmal i lukim na ritim wanpela edvetismen long *Wantok Niuspepa* taim **Poto 2** i soim tripela pikinini i holim niuspepa na soim fevered pes i gat stori bilong ol yangpela.

Poto 3 i soim mama na ol pikinini i soim *Wantok Niuspepa* olsem pepa we i save kamap long ples bilong ol na ol i kisim save, nius na ol arapela infomesen long en.

Mama na ol pikinini i sanap wantaim SVD Bruder, yangpela Bruder Szymon Porwol i wok wantaim *Wantok Niuspepa*, tasol i go long wanpela bung bilong ol SVD long Madang na i raun i go long Malmal viles.

Poto 4 i soim ol yangpela meri i amamas long kisim Wantok Niuspepa long olgeta Sande na ritim long kisim save na infomesen long en.

Ol Poto: Pater Grzegorz Kubowicz SVD



Olpela mango diwai karim kaikai



I graun mentenens kru bilong REL i amamas wantaim nupela prut bilong olpela as mango diwai. *Ol foto: James G. Kila*

James G. Kila i raitim

PLANIM sit bilong mango em i save gro tasol kamautim as diwai bilong wanpela bikpela diwai mango na go planim long narapela hap em i nupela samting.

Long 2009 taim nupela developmen i kamap long wokim ol haus insait long MCC Glas-haus banis long Madang long Seksen 95, alotmen 80, ol wokman i bin klinim eria we pastaim i gat bus, diwai na tais-wara na ol setelmen bilong Raikos na Bundi i stap.

Dispela olpela as mango diwai i gat naispela stori, na nau yet em i sanap wantaim ol naispela prut insait long banis bilong Ramu NiCo Menesmen (MCC) long Madang taun.

Sampela bilong ol wokman husat i bin stap long dispela taim bilong kamautim as bilong mango diwai tu nau i stap yet wantaim papa-graun kampani Raibus Engineering Limited (REL) long Seksen 95 o 'Glas Haus' eria.

Tru tumas, ol wokman i givim nupela laip gen long dispela mango diwai.

Ating sapos dispela olpela as mango diwai i gat maus long toktok em bai mekim bikpela tok amamas na tenkyu i go long ol lain husat i givim moa taim long lukautim em.

Paul Tropu, husat em mentenens supevaisa bilong REL i stori olsem long taim wok i bin laik stat long wokim ol nupela haus-slip insait long kompaun bilong MCC ol wokman klinim na rausim ol olpela diwai long eria.

Tasol wanpela lapun bosman bilong Saina i tokim lain wokman olsem em i laikim ol prut diwai we i stap insait long eria em ol i mas lukautim. Olsem na ol wokman i bihainim tingting bilong em na ol yusim ekskeveta masin long kamautim dispela bikpela mango diwai wantaim olgeta ruts o as-rop bilong en stret na karim i go planim long narapela eria we ol i redim gut pinis.

Narapela wokman Jacob Uyam wantaim Jimmy Yaringu tu i givim stori bilong dispela mango diwai.

"Saina man i tok ating em moabeta long kamautim as bilong mango diwai ya na go planim long narapela hap bikos sapos ol i planim sid bilong mango, em bai kisim longpela taim long gro na karim kaikai," Jacob i tok.

Olsem na ol wokman i yusim bikpela ekskeveta masin long kamautim olgeta as bilong mango diwai na muvim i go long nupela ples we wanpela bek-ho masin i digim graun na redim i stap.

"Mipela yusim wanpela bekho long digim

bikpela hol redi, na tu mipela putim ol gutpela blek-pela graun i gat gutpela gris na putim wara na bihain mipela i planim dispela mangi diwai wantaim olgeta ruts bilong en," Paul Tropu i tok.

Bihain long ol i planim dispela mango diwai, ol i givim gutpela lukaut na was stret long en.

"Taim mipela i planim mango ya pinis, mipela i karamapim em gut wantaim grinpela seid klot na tu givim em wara olgeta taim, stat long moning na tu long apinun," Paul Tropu i tok.

Em i tok tu olsem ol boi bilong em i lukautim dispela mango diwai gut stret olsem 'bebi' bilong ol.

Ol dispela hatpela stail wokman bilong REL nau i amamas tru taim ol i lukim dispela mango i karim namba wan flaua bilong en na tu ol prut i hangamap pinis.

Long las wik ol stail wokman bilong REL graun kru em Paul Tropu yet wantaim Jacob Uyam, Danny Akui, Dismas Kiwar, Thomas Mara wantaim Jimmy Yaringu i go sekim prut bilong mango diwai na mangalim prut i stap taim Wantok Niuspepa i bungim ol.

Nau tu em prut sisen long Madang na em Krismas taim tu olsem na ol i amamas olsem hatwok bilong ol i karim gutpela kaikai olsem blesing bilong Krismas 2015.



Olpela as bilong mango diwai soim nupela brens i karim prut.

Amamas wantaim Jack's

Nicky Bernard i raitim

KRIMAS i kam klostu nau na planti manmeri na pikinini bai redi long baim presen bilong ol pren na famili bilong ol.

Planti ol stoa tu bai amamas long mekim mani long dispela taim long Krimas na Nupela Yia.

CPL Grup tu i wok long gro go bikipela na bikipela moa yet wan-

taim ol stoa na kemis bilong ol insait long PNG.

Long Tunde dispela wik ol i bin opim nupela stoa bilong ol ol i kolim yet long "Jack's". Dispela stoa bilong em bai namba tu nau long Pot Mosbi. Ol bin opim bikipela wan long mun Epril long dispela yia long Sentral Waigani na dispela em namba tu insait long Vision City.

Jack's em stoa i save salim ol

klos, su, aiglas, ol samting bilong pilai spot na planti moa. Ol kaikai em ol i no save salim. Na planti samting bilong ol i kam stret long Fiji na ol fektori bilong mekim klos long hap

Bikman bilong "Jack's" long Fiji i tok, krismas em klostu nau na ol traime long mekim ol kastoma i amamas long krismas olsem na ol opim dispela nupela stoa long Vision City long mekim ol manmeri

na pikinini bai isi long ol long baim ol samting bilong krismas.

Planti bilong ol samting insait long Jack's stoa long Vision City i wankain tasol long Sentral Waigani tasol long VC em liklik spes.

Sapos yu laikim painim krismas presen bilong fren na famili bilong yu, traime raun long Jack's na lukim ol samting long hap bai ken amamasim pren na famili bilong yu.

Stori bilong tumbuna

Tit bilong tupela meri i kamapim Simbu Lime stone projek

BIPO tru tupela pikinini meri bilong tupela hetman bilong ples Chuake long Simbu ol i stap. Na tupela pikinini meri nem bilong ol em Diau na Sani, ol i naispela tru na ol i no gat wanpela makmak i pas long skin bilong ol, ol i olsem ensel stret na olgeta man i save dai long maritim ol.

I no longpela taim yet na ol i karim pe bilong tupela i kam long maritim ol na olgeta famili bilong tupela ol i wanbel na askim laik bilong tupela na grisim ol long tok orait tasol tupela i les long marit na ol i karim pe i go bek na bihain long nait bilong tupela kirap paitim ol nogut tru na brukim tit bilong ol.

Tupela i pasim tok long nait tasol long go indai na bihain long tupela de ol i bilas gut tru na ol i go hangamap long wanpela diwai Kapiok na ol i dai.

Na long driman tupela meri i tokim ol olsem wanpela taim bai dispela tit bilong mipela yupela i brukim bai kamapim bikipela mani na olgeta man na ol waitpela man bai painim dispela waitpela tit.

Olsem na nau Simbu Limeston i kamap long Maun Elimbari long dispela ples ol meri i bin indai. Em long as bilong dispela maunten Elimbari na dispela em trupela stori.

Migel B. Philip

Meri i kamap diwai

BIPO tru tupela marit stap na ol i gat wanpela bebi gal tasol na wanpela taim tupela i koros na pait nogut tru na man i brukim pes bilong em meri i wari nogut tru na long nait em i go na hangamapim em yet na indai.

Ol i planim em na bihain long sampela de wanpela diwai i kamap long matmat bilong em na man bilong em i was long dispela diwai inap em i bikipela hariap tru.

Na taim bebi gal i save kraik long susu dispela diwai em i save kapsaitim klinpela wara i go daun na man i save pulmapim na givim long bebi na mama i save givim susu i go inap gal em i bikipela na redi long go marit na dispela diwai i kwiktai em i drain a em i tokim em olsem mi yet mama bilong yu i lukautim yu inap yu bikipela pinis olsem na mi go bek long matmat tasol yu mas lukim dispela diwai em i tasol.

Migel B. Philip



Wok meri bilong Jack's husat save lukautim ol han kilok.



Ol wok manmeri bilong nupela Jack's stoa long Vision City.



Namba wan kastoma bilong Jack's taim ol i opim tasol Vision City long dispela wik.



Wanpela wok meri bilong Jack's i soim ol Tisot ol save salim.

Ol poto Nicky Bernard

TOKSAVE:
WANTOK i askim ol gutpela rida bilong em long salim ol **tumbuna stori** i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail unit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C/Word Publishing Company, P O Box 1982, BOROKO, NCD, PNG* o email edres: editorial@wantok.com.pg Telepon namba: 3252500.
Tenkyu

Em nau! Ol pikinini i ken painim rot i go long ples wantaim Wantok kru...



Kanage lukim driman

KANAGE i slip long nait na lukim wanpela driman olsem em wantaim kandere meri bilong em i swim long wara plai plai na was was i stap.

Em i kirap nogut na lukim olsem dispela em i driman nating tasol.

Kanage em i wail stret long dispela driman. Neksde long bik moning em i ron i go long haus bilong kandere meri, i go holim han bilong meri ya na stori long driman bilong tupela.

Meri ya i harim dispela driman na em i bikmaus na ran i go long haus na tokim olgeta famili na ol i kam ausait na kilim Kanage hap indai na em ai raun.

Wally Anis
W.H.P

Kanage go long Manu maket

KANAGE i kalap long Waigani na i laik go long Manu maket. Em i kalap long bas na boskru i askim em long basfe. Kanage i holim tasol 40t.

Em i givim na nogat toktok, em i sindaun tasol. Boskru i askim em bai go daun long we. Em i no bekim. Boskru tok orait em bai go daun long 4 Mail.

Ol i kam long 4 Mail na boskru stopim bas na tokim Kanage long go daun. Kanage i kirap na tok, oi...yu toktok long husat ah??




Boskru i kirap na tok, "Toktok maski kalap go daun. 40t tasol yu baim."

Kanage i kirap na tok, oi be kava o (yu long long o) mi baim 80t na yu laik sasim mi haumas?

Tupla stat kros nau na ol man long bas i sapot na olsem, Kanage i givim 80t.

Draiva tupela boskru i nogat moa toktok. Kanage i sindaun tasol na kalap i go daun long Manu long 40t tasol.

Ansa bilong Wod Pilai isu 2151



Ol wod lista hia:

- ANINIT
- ANDAPENS
- APLAI
- BAPTAISIM
- BENSIN
- BIHAINAIM
- DEWEL
- DISPELA
- DOK
- GAVANA
- GOAUT
- GUTNIUS
- HARIM
- HOS
- KAMDAUN
- KAUNIM
- KOKONAS
- LASPELA
- LONGTAIM
- MEYA
- MUMU
- MUVIM
- OLABOI
- PAPAI
- PISIN

E T G S R E Z D U S P D I R C T T T A I
 G O O E A R P M A M A L T S N T N E V K
 Z P A P A I U A C B P E F L K V N R G T
 H M U V I M T I S G L E O M M F R O A D
 E G T O I I H E S D E F U S G H S N Y F
 I A A N U B O Q W E O M S T A W B M H S
 R S U V E D S S E W T K R V E C I A L G
 K A M D A U N R T E E N Y D S K P C B T
 K D O L N N U E R L I E W E T E M O L Q
 I A I A D H A D H A R I M N V O B K F R
 S S B S A G T L L N V L F R D C N M T T
 N P A P P R T P O I S L D T I E M D A S
 C O P E E E A C I N M G H L E O M X E E
 E L T L N I L M S I E R B R O S R L E N
 P A A A S L A A A T P M E Y A I T R H D
 O B I H A I N T A I M I N I X Y E S H H
 I O S R S O G U T N I U S E N R R E C D
 B I I T K N F X B B S A I I R S K E T E
 S A M O O B E A N L T N N G N F U S Y T
 M C K L K A T N S A H I S M E V C I E E

E O A V O A G D Z T J T J P E R N C L Q
 X F C P V T G E H Y E H O L R D D N A P
 L O N S I M L P A F O N F G T W L O N A
 E Q E P E N D A X R N P G U N H I E Y Z
 R K U K A T U N G F G X B C R T S N S S
 E E S N Y P G N R Y H U V P E E T D N R
 M F R E N S A P A S B U K R K F A E O A
 S G H Y B M L S K N A M O E X J I E B Z
 G X H E E K A E M S U C J E G E O P S B
 A E I O L A W G U D T T S G N G G F O E
 F S F B A T E P M I T E O T F C B L I E
 U M H L M O N I U P M M G A F H K P W H
 T L K G A L S N T D N G H N E A B P B A
 N O A H M I T I I I H D S H I X L N R R L
 Z N M D A K P S M R E N D O W T N D A N
 L G A T S E W T K E W H I R T W T G S A
 O T P A I T I F A E A E A C S I N N T S Q
 C A B P M A R I L A L R G E G T G R O F
 B I E U Z N I M S I D I O A Q Y R E F L
 E M G E H J R A O V E M M R U B T A U L

Tok lukaut long nupela teroris birua: Obama



Obama i wokim toktok i go long kantri

PRESIDEN Obama i tokim ol pipel bilong Amerika olsem i gat nupela stail we ol teroris i yusim long karimaut ol birua pait bilong ol. Dispela em bihain long kilim dai i bin kamap long San Bernardino, California long Amerika long wiken we 14 pipel i dai long en.

Presiden Obama i tok ol FBI i mekim ol wok painimaut, tasol em i tok i no gat evidens yet long sutim tok long ol teroris grup long kantri o long ovasis.

Long toktok bilong em i givim aut long Oval opis, Mista Obama i tok stail bilong ol teroris long kamapim birua long Amerika i senis nau long dispela ol i bin wokim long 9/11.

Em i tok nau ol i yusim o bihainim ol isipela rot olsem tagetim na wokim sutaut long ol ples we planti pipel i bung long en.

"Bai yumi stap yet, tasol yumi mas smat," Presiden

Obama i tokim kantri.

Em i tok tupela marit i bin go pas long sutim dai long San Bernardino, em Syed Farook na meri bilong em, Tashfeen Malik, em mama i karim ol long Amerika i bihainim tudak rot i no stret we ol i ting olsem lotu bilong ol, Islam, i singautim woa egensim Amerika na Wes.

Mista Obama nau i singaut long Kongres long stopim ol teroris saspek o ol dispela i stap long "No fly lista" ol dispela i stap long lista long ken baim gan, na i salim tok lukaut olsem tru, ol intelijens ajensi i ken smat, tasol ol no inap long luksave long olgeta lain bai karimut ol sutaut bipo ol i go het long kamapim birua.

Long wankain taim, Wait Haus i op long ol tingting bilong kisim moa spesel fos long pait egensim ol Islamik Stet (IS) paitman long Iraq na Syria we ol i wok long glasim ol samting.

Birua long Leytonstone Tube stesen: man i kisim sas



Birua kamap long andagraun stesen long Sarere

OL i sasim Muhaydin Mire i gat 29 krismas bihain long sutim narapela man i gat 56 krismas wantaim naip. Dispela samting i kamap long long Tube andagraun stesen long is London long las wik, Sarere, polis i tok.

Dispela man husat i kisim bagarap i stap wantaim bikpela sua na narapela tu i kisim bagarap i stap olsem tasol.

Polis ripot i tok man i wokim trabel i stap nau long

han bilong ol polis husat nau i laikim moa woklain long kam na lukautim pablik.

Polis ripot i tok ol ekstra polis opisa ol i kisim bai werim yunifom na sampela bai nogat. Ol bai kisim moa sapot long ol arapela risos olsem polis dog yunit, CCTV network kemra, na planti tausen wokman long reil rot hap.

Polis ripot i tok ol i stromim pablik long stap isi na yusim pablik trenspot i stap.

Painim galeon o bikpela sip i bin bagarap na go daun long solwara wantaim planti naispela samting.



Ol i lukim dispela sip olsem holi greil bilong ol lain bilong Spain. Sip i bin bagarap na go daun long solwara taim em i karim ol gutpela na naispela samting i kam long ol koloniel kantri.

Kolombia (Colombia) em wanpela kantri long Saut na Latin Amerika i painim pinis wanpela bikpela sip ol i kolim long San Jose, bilong Spain we ol Britis i bin mekim i go daun long solwara long Karibien moa long 300 krismas i go pinis. Sip ya i wok long karim ol gol na ol narapela ston bilong mekim ol juwelri we pe bilong em i abrusim ol bilien Dola.

Long planti yia, ol tresu hanta i wok long painim dispela sip tasol no gat. Ol i painim ol planti arapela, tasol dispela i bin stap olsem wanpela mistri inap nau.

Presiden bilong Kolombo, Presiden Manuel Juan Santos i amamas na tok, "Dispela em i bikpela samting tru long painim long histori bilong man long dispela graun."

Sip San Jose i bin go daun long solwara klostu long ailan, Islas del Rosario long Jun 1708 bihain long pait wantaim ol sip bilong Briten we i bin laik kisim ol kago long sip ya. Woa o pait i bin hap bilong pait bilong Spain long bruk lus.

Dispela galeon i bin bikpela sipnamel long ol narapela sip i wok long karim ol tresu olsem gol, silva na ol

arapela naispela samting ol i kisim long ol koloni bilong Spain long Amerika bilong givim long King Philip 5.

Ol i bilip olsem sip ya i wok long karim ol samting olsem ol gol koin na ol juwel manim mak i abrusim 11 milien dola, na sapos ol i painim o dispela samting, em bai narapela stori.

Liklik lain kru tasol i no lus taim sip San Jose i bin go daun long biksolwara.

Wanpela risets tim bilong Kolombia na ol foren risets lain i gat long em wanpela husat i bin stap wantaim tim i bin painim sip Titanic long 1985, i bin stadim ol win na karen bilong solwara long Karibien 307 krismas i go pinis na tu, karim ol risets long ol akaiv na laibreri long Spain na Kolombia long ol sip i bin go daun long solwara long painim sampela kain koneksen.

Na long Novemba 27 long dispela yia, ol ekspet o save man i bin autim ripot olsem ol i painim sip San Jose i slip long sait long as bilong solwara wantaim kago i gat ol narakain brons kenon we i gat piksa bilong ol dolpin long en.

Taim bilong David Cameron i go pas

DAVID Cameron i lida nau bilong Konsevertiv Pati long 10-pela krismas nau na senis long yangpela 39 krismas i statim wok long politiks i go long koalisen lida na bihain, winim ileksen na kamap praim minista bilong Briten.

Hia em ol bikpela wok em i wokim insait long las 10-pela yia:

- 1 Winim Konsevesen lidasip long Disemba 2005. David Cameron i bin winim feveret David Davies long kisim top wok. Wanpela de bihain, Cameron i tokim Tony Blair olsem, 'wanpela taim, yu bin futja.'
- 2 Sanap wantaim ol dog long ais long Epril 2006 na ran long ais we ol dog i go pas long en. Husart bai lus tingting long dis-

pela we i soim em olsem man o pati bilong em i gat wok na tingting long lukautim ol animel.

3 Statim naispela pasin brata long Rose Gaden taim em i fomim koalisen wantaim Nick Clegg, bihain long 2010 ileksen risal. Taim em i kisim askim long feveret tok pilai bilong em, em bin tok, 'Nick Cleg'.

4 Givim tok orait long karimaut ol eastraik long Libya long yia 2011. Ol i tok Mista Cameron i no bin ting olsem em b ai spendim bikpela traim long foren polisi. Arab Spring na ol trabeln na birua i senisim ol dispela.

5 Odaim Angela Eagle long "Stap isi dia" long PMQs long 2011. Ol

Trein i bam long bas na kilim 19 pipel



The Trein i bamim bas long krosing na kilim 18 pasindia

SAMTING olsem 18 pipel i dai pinis bihain long wanpela trein i bamim wanpela liklik bas long krosing long Jakarta, kapitel bilong Indonesia.

Bas draiva i bin asua bikos em i abrusim ol sain na krosim reil rot trek long westen Jakarta, polis ripot i tok.

Polis ripot i tok 13-pela pasindia i bin dai kwiktaim taim birua i kamap na draiva na asisten bilong em i bin dai taim ol i kisim ol i go long

haus sik. Nogat man long trein i dai.

Planti trenspot eksiden i save kamap long Jakarta we rot i save pulap long ol kar, na ol bas na trein i lapun, na no gat gutpela mentenens long ol.

Long 2013, 7-pela pipel i bin dai na planti i kisim bagarap na go long haus sik taim wanpela trein i bin bam wantaim piul tenk long krosing long Jakarta na i paia na birua i kamap.

NASA i soim ol bes poto bilong Pluto



NASA i soim ol bes poto bilong Pluto i go long pablik

NASA i autim ol gutpela poto stret we em i kolim olsem ol bes poto tru we ol i kiisim klostu stret long planet Pluto we man i lukim insait long planti yia.

Spes sip ol i kolim long New Horizon i bin kisim ol dispela poto taim em i plai abrusim dispela liklik planet long mun Julai long dispela yia.

Alan Stern em prinsipel investigeta bilong New Horizon i tok olo dispela nupela piksa bilong Pluto i soim yumi long ol kreta, maunten,

ol ais fil long sotpela taim spes sip i karimaut wok bilong em long planet Pluto.

Em i tok long ol arapela planet olsem Mars na Venus, em i bin kisim planti krismas long kisim ol poto olsem.

Mista Stern i tok ol dispela poto bai helpim ol stret long planti wok bilong ol long sait bilong saiens

Spess sip New Horizons i bin ran moa long tri bilien maili na 9 na haf yia long go insait long sistem o rot bilong planet Pluto.

Ol stori na poto i kam long news.sky.com

- 8 Maski sampela pati memba i egensim, em i tok oraitim lo long ol gay na lesbian o ol man i maritim man na ol meri i maritim ol meri long 2014.
- 9 Go insait long No kempen long lukim olsem ol non-Tory vota i no egensim em i stap, tasol em i bin amamas taim ol Scott i vot long sapotim EU.
- 10 Toktok strong long Palamen long karimaut kempen long bomim Syria.

Mista Cameron i bin sem taim em i lus long 2013 vot long karimaut ea straik egensim Presiden Bashar al Assad. Tupela yia bihain, hevi long Syria i kamap na ol MP i vpt long sapotim bomim ol Islamik Stet taget long Syria.



TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

President Obama i toktok long helpim klaimet senis hevi long Pasifik

Presiden Barack Obama bilong Amerika i bunigm ol Pasifik Ailan lida long klaimet senis bung long Paris, Frans. *Poto: ABC*



Caroline Tiriman i raitim

PRESIDEN bilong Amerika, Barack Obama, i tokim pinis ol lida bliong Pasifik husat i stap long bikpela Klaimet Senis miting long Paris olsem Amerika bai wok wantaim ol kantri bilong ol long daunim wari bilong klaimet senis.

Presiden Obama i bungim ol Pasifik Ailan lida lo bilong Kiribati, Marshall Islands na Papua New Guinea, wantaim tu ol lida bilong Caribbean olsem Barbados na Saint Lucia.

Presiden Obama i bin tokim ol dispela lida olsem Klaimet Senis i wanpela bikpela hevi em bai hamarim gut ol dispela kantri, na ol bikpela kantri olsem Amerika i mas helpim ol wantaim ol dispela hevi.

"Taim weda o bikpela san o ren i senis, bai gat planti

milien klaimet senis refuji long Esia na Pasifik rijon, na mi tok pinis olsem mi wanpela ailan mangki bikos mi groap long ailan. Mi luksave long naispela na hevi long ol ailan na bagarap we ol i ekn bungim," Mista Obama i tok.

Tasol wanpela mansave long ol wok politik na ikonomi long Pasifik rijon i tok em i gutpela Presiden Obama i mekim dispela toktok long sapatim ol Pasifik Ailan na ol narapela ailan lida long wol.

Dokta Tarcisius Tara Kabutaulaka, Asosiet Profesa long Yunivesiti bilong Hawaii Senta

bilong Pasifik ailan Stadi i tok em i wari liklik olsem klostu nau na Presiden Obama bai pinis long wok bilong en na em i no save sapos nupela presiden husat bai senisim em bai gat wankain tingting olsem Presiden Obama.

Dokta Kabutaulaka i tok planti gavman lida bilong 195 kantri i stap long dispela miting, na minista bilong Nesenel Disasta Menesmen long Fiji, Inia Seruiratu, i wanpela long ol dispela lida husat i tokim miting olsem ol Pasifik kantri nau i wok long kism taim long klaimet senis.

Ektivis i tok Australia i no minim tru tru long daunim posin gas long ea

Solwara i wok long bagarapim ol ailan bilong Ontong Java long Solomon Ailan.

Caroline Tiriman i raitim

WANPELA memba bilong 350 Pasifik i sanap makim ol yangpela pipel long daunim klaimet Senis i tok Australia i luk olsem em i no sapatim tingting bilong daunim ol grin haus ges long bikpela UN klaimet senis miting we i go he nau long Paris long Frans.

Isso Nihmei em Kodineta bilong 350 Pasifik long Vanuatu i mekim dispela toktok bihainim ol miting bilong ol Non Gavman Ogenaisesen long Paris we ol i traim long toktok strong long ol lida bilong wol olsem klaimet senis i wok long bagarapim pinis ol Pasifik ailan kantri.

Mista Nihmei i bin wanpela



long ol yangpela Klaimet Warias bilong Pasifik husat i bin kam mekim protes mas long Australia long 2014 long toksave long ol pipel bilong Australia olsem ol bikpela wok bisnis olsem Koll i wok long bagarapim klaimet.

Em i tok ol yangpela pipel bilong rijon i sapatim askim bilong Presiden bilong Kiribati,

Anote Tong long Australia i mas daunim wok bilong Koll maining.

Mista Nihmei i tok i luk olsem kain Australia i go het long kirapim ol kol na ol arapela indastri we i autim posin ges long ea i minim em i no tingting bikpela long hevi bilong ol Pasifik ailan long sait long klaimet senis.

Bruce Davis i nupela Hai Komisina long PNG

Bruce Davis, nupela Hai Komisina bilong Australia long PNG. *Poto: ABC*

Sam Seke i raitim

FOREN Minista bilong Australia, Julie Bishop i tokaut olsem Bruce Davis i nupela Hai Komisina bilong Australia long Papua Niugini.

Mista Davis bai senisim Deborah Stokes husat i bin Hai Komisina long PNG stat long 2012 i kam inap nau.

Dipatmen bilong Foren Afeas na Tred i tok i kam inap nau ya, Mista Davis i bin Vais-President bilong Asian Development Bank. Em bin wok tu olsem Embaseda bilong Australia long Ireland na i bin Deputi Seketeri Jeneral bilong Pasifik IAilan Forum.



Mista Davis i bin Dairekta Jeneral tu bilong wanem ol i bin kolim Australian Agency for International Development (AusAID) long 1999 igo inap long 2009.

Long toktok bilong en, Mis Bishop i tokaut long gutpela

wok poroman namel long Australia na PNG we igat tred namel long tupela we i nau stap long mak bilong \$6.8 billien.

Em i tok Australia i givim tu \$554.5 millien long helpim PNG long 2015-2016

PNG na olgeta Pasifik ailan kantri i mas strongim pait egensim AIDS

PNG World AIDS Day 2015 Ekspo long Por Mosbi. *Poto: ABC*

Sam Seke i raitim

BOSMAN bilong UNAIDS long Papua New Guinea, Stuart Watson, i tok PNG na ol arapela kantri long Pasifik i mas noken stap isi long pait egensim sik HIV/AIDS.

Mista Watson i tok mak bilong pipel husat i kism dispela sik long PNG i go daun liklik.

Tasol em i tok wok long kontrolim HIV/AIDS long PNG, wok i mas go het strong long wanem, em bai kamap bikpela moa sapos



yumi lus tingting long en.

Mista Watson i mekin dispela toktok taim wol i bin makim World AIDS Day long Tunde las wik.

Em i tok PNG i gat namel long 37,000 na 38,000 manmeri i gat sik AIDS na samt-ing olsem 95 pesen long ol HIV/AIDS keis long Pasifik.

Australia i helpim gut ol Pasifik kantri long sait long disabiliti

Ipul Powaseu, Siameri bilong PNG Assembly of Disabled Persons wantaim ol Foren Afeas lain bilong Australia. *Poto: ABC*

Caroline Tiriman i raitim

IPUL Powaseu husat i gat disabiliti na Siameri bilong PNG Assembly of Disabled Persons i tok amamas long gavman bilong Australia aninit long Dipartmen bilong Foren Afeas na Tred nau i wok long helpim ol People

Living with Dissability long Pasifik rijon long bihainim gutpela laip.

Wanpela samtig em dispela wok i karamapim em long mekim wanpela wok painimaut long tripela kantri, em long Fiji, Kiribati na Samoa long wanem kain wok ol dispela kantri i mekim long helpim ol pipel i gat sampela hap bodi i bagarap na ol i stap long ol dispela wan wan kantri.

Mani em Australia i givim i

bilang stretim ol klasrum long ol skul bilong lukim olsem ol wilsia bilong ol disable pikinini i ken go insait long ol klasrum.

Mis Powaseu i wanpela long tripela konsalten em Australia i bin makim ol long mekim dispela wok painimaut.

Em i bin stap long Kiribati long stat bilong dispela wik we emei bin go lukim ol pipel living with disabiliti long hap na mi askim em long dispela samtig.



OTML mekim senis long kirapim maining gen



OK Tedi Maining Limited (OTML) i wok long mekim sampela ol bikpela senis long larim opresen bilong maining i kirap gen bihain long ol i pasim maining taim drai weda na hot san i daunim level bilong Flai Riva.

Wankain olsem ol arapela kopa na gol maining kampani, OTML tu i wok long bungim bikpela salens taim prais bilong ol metal olsem gol na kopa i wok long go daun insait long 6-pela yia nau.

Aninit long ol dispela hevi, OTML i ting ting long mekim sampela bikpela senis we dispela bai kirapim produktiviti na daunim prais bilong opresen.

Ol wok manmeri bilong OTML i kisim toksave pinis long wanem samting bai

kamap long sais bilong wok-fos, taim bilong wok, tems na kondisen bilong wok, haus na travel samting bilong ol wok manmeri.

Taim opresen bilong maining i kirap gen, OTML bai daunim 10 pesen bilong namba bilong ol wokman i kam daun na olgeta wok manmeri bai no moa slip long haus bilong kampani tasol ol bai flai i kam insait na flai i go aut long wok ples.

Kampani bai larim ol lokal wok manmeri long Tabubil na Kiunga yet long rentim kampani haus na muvim ol famili bilong ol i kam insait long ol dispela haus bilong OTML i stap nating.

OTML i saspending o stopim ol opresens bilong en long Ok Tedi Maining tasol sampela wok manmeri i stap

yet long mekim ol wok mentenens, sekyuriti na redi long kirapim gen opresen.

Sampela ol namba wan wok long Mein Inlet Valvs long Ok Menga Haidropawa Stesen na ol mentensens wok prosesin plent bai pinis klostu taim tasol.

Ol wok i wok long go het long sekim sapos ol i ken putim nupela Sag mil long yia 2016.

OTML i wok long glasim na sekim gut ol weda samting long larim maining opresen i kirap gen.

Liklik ren i pundaun long Ok Tedi eria tasol dispela i no insap long larim maining i op gen.

Kampani i lukluk long opim gen maining long mun Februari o Mas 2016 sapos weda kondisen i orait gen.



Balus i ran antap... Piksa i soim wanpela Q400 balus bilong Qantas Link i lusim Jackson's ples balus long Pot Mosbi na i laik go long Cairns, Australia. Cairns em i wanpela ples long Australia we planti balus long Pot Mosbi i wok long ran i go kam bikos planti ol wantok bilong yumi i stap long hap. Sampela ol i baim ol haus na pikinini bilong ol i skul long hap. Air Nigini, Qantas Link, Link PNG na Virgin Blue em ol balus kampani we i save kisim ol pasindia i go kam long Cairns na Pot Mosbi. Prais bilong baim balus tiket long go long Cairns em i no bikpela mani. *Poto: Nicky Bernard*

PNG mas gat sastenebel eneji

Aja Potabe i raitim

PNG em i wanpela kantri insait long Pasifik rijon we gat planti samting bilong kamapim sastenebel eneji.

Haidro pawa, sola pawa, win pawa, baiomas, jiotemal pawa na naklia pawa em ol samting bilong kamapim sastenebel pawa o klin eneji.

Dispela ol samting bilong kamapim sastenebel pawa i mas kamapim pawa saplai long ol Pasifik ailan kantri bikos dispela em i wanpela rot bilong daunim klaimet senis birua.

Dispela em i toktok i kam long Andrew Daka, husat i Ekeketiv Dairekta bilong Pasifik Pawa Asosiesen long Suva, Fiji.

Mista Daka i bin sindaun wantaim 3-pela save man bilong eneji long wanpela bung we Wol Benk Grup i bin holim long Sidni, Australia las wik Fraide.

Mista Daka i tok PNG em i wanpela kantri insait long Pasifik we em i gat olgeta samting long kamapim klin eneji na gavman i mas yusim gut ol dispela samting long kirapim ol gutpela samting long kamapim nupela sos bilong kamapim klin eneji.

"PNG em i wanpela kantri we em i gat gutpela wara i ran long maunten long kirapim haidro pawa saplai.

"Gutpela san i save kamap long PNG tu long kirapim sola pawa projek.

"Long sampela ples olsem long maus bilong Flai Riva na long Milen Be provins, i gat gutpela hap we wara em i strong tumas long kamapim taidel eneji.

"Strongpela win tu i save kam long sampela ples arere long solwara,"Mista Daka i tok.

Em i tok ol Pasifik ailan kantri i les long yusim ol disel jenereta bikos smuk bilong ol disel jenereta i save kamapim grin haus ges.

Ol grin haus ges i save kamapim ples i kamap hot moa na dispela hot i save larim ol ais i kamap wara.



Ges i paia long PNG LNG Plent sait ausait long Pot Mosbi. Dispela kain smuk i kamaut long ges, wel na diesel jenereta i save kamapim ol grin haus ges we bai kamapim birua bilong klaimet senis na globel woming o ples i go tuhat.

Dispela wara i wok long kirapim level bilong solwara na i wok long daunim ol liklik ailan kantri insait long Pasifik na arapela hap long wol.

Mista Daka i tok PNG i save yusim disel jenereta long kisim pawa saplai.

"Maski PNG i gat olgeta samting long kirapim klin eneji tasol PNG i save yusim ol disel jenereta long kisim

pawa saplai,"Mista Daka i tok.

Em i singautim gavman long inves long ol sastenebel eneji projek bikos PNG em i bikpela kantri long Pasifik ailan na dispela bai soim ol arapela liklik kantri long rijon olsem PNG em i trutru mekim sampela samting long pait egensim birua bilong klaimet senis.



Port Moresby to Port Vila

Our schedule Pt Moresby-Pt Vila | Pt Vila-Pt Moresby
WED 1000HRS | THU 0800HRS

Air Niugini connecting Melanesia.

Call Toll Free on 180 3444 or contact your nearest Air Niugini Travel Centre or Travel Agent for further details.

Air Niugini  
www.airniugini.com.pg

Juffa na Wobiro sapatim PNG Air

Aja Potabe i raitim

LONG olgeta ples balus insait long PNG we PNG Air i bin kisim nupela ATR 72-600 balus i go, planti ol manmeri i bin amamas long lukim dispela nupela balus.

Ol manmeri husat i bin stap klostu long ples balus long lukim dispela namba wan ATR balus bilong PNG Air i bin putim planti askim long ol wok manmeri bilong PNG Air na tu ol nius manmeri husat i bin sindaun long dispela balus na raun long olgeta ples balus long PNG.

Tasol tupela lidaman i bin amamas stret na i bin soim bikpela sapat long PNG Air long sevim manmeri bilong provins bilong tupela.

Oro Gavana Gary Juffa na Westen Gavana Ati Wobiro i bin soim amamas bilong tupela long PNG Air taim dispela ATR i bin go pundaun long Girua ples balus long Popondetta, Oro Provins na long Daru ples balus long Westen Provins.

Oro Gavana Gary Juffa

Tripela wik i go pinis, ATR balus bilong PNG Air i bin go pundaun long Girua ples balus long Popondetta.

Dispela ran bilong balus i bin karim Gavana Juffa, Siaman bilong PNG Air Murray Woo, Sif Komesal Opisa bilong PNG Air Paul Abbot, Seketeri bilong Helt Diptamen Pascoe Kase na ol nius manmeri i go long Girua long nambawan ran bilong balus.

Balus i bin ran long planti ples balus insait long kantri we PNG Air (o pastaim Airlines PNG) i save mekim ran bilong em.

Tasol long dispela ran i go long Girua ples balus, Gavana Juffa i bin amamas stret long sindaun long dispela nupela balus.

“Mi no amamas olsem mi wanpela nambawan pasindia bilong dispela balus i go long Popondetta tasol dispela balus i luksave long provins na pipel bilong mi,” Mista Juffa i bin tok taim balus i pundaun long Girua ples balus.

Moa long 3, 000 manmeri wantaim ol pikinini i bin wet i stap long Girua ples balus long tok welkam long Mista Juffa na ol senia opisal bilong PNG Air.

Mista Juffa i tok PNG Air em kamap olsem wanpela nambawan patna long kirapim turisim na egrikalsa sekta long provins bilong em.

“Mipela i laik opim Oro Provins. Provins bilong mipela i gat bikpela sans long kirapim moa bisnis long sait bilong turis na egrikalsa.

“Ples balus bilong mipela bai klostu taim tasol kamap wanpela bikpela intenesenel ples balus. Mi laik tok tenkyu long PNG Air i kamap olsem wanpela nambawan patna bilong mipela long kirapim Oro Provins,” Mista Juffa i tok.

Em i tok Oro Provinsal gavman bai mekim olgeta samting long larim PNG Air mekim bisnis gut long Oro Provins.

“Provinsal gavman bai sapatim PNG Air long mekim ples i orait long larim PNG Air i kamap patna bilong mipela na givim ea sevis long ol pipel bilong yumi,” Gavana Juffa i tok.

Em i mekim dispela toktok taim Siaman bilong PNG Air Murray Woo, Sif Komesal Opisa bilong PNG Air Paul Abbot, Seketeri bilong Helt Diptamen Pascoe Kase, ol wokman bilong China Railway Engineering (kontrekta bilong mekim ol mentenens wok bilong Girua ples balus), ol nius manmeri na moa long 3, 000 asples i harim i stap long Girua ples balus.

Mista Juffa i tok em bai toktok strong long Palamen long larim

gavman i daunim ol takis mani gavman i save kisim long ol kampani.

“Long Palamen, bai mi singaut strong long gavman long daunim takis mani long kain kampani olsem PNG Air.

“Dispela i ken daunim prais bilong baim balus tiket. Planti manmeri bilong PNG i save kisim hat taim long baim balus tiket bikos mani mak o prais em i antap tumas.

“Bai mi toktok strong long Palamen na askim gavman long lukluk i go insait long dispela samting na larim ol manmeri bilong yumi i raun gut long balus long liklik mani,” Mista Juffa i tok.

Mista Woo i tok PNG Air em i balus bilong ol grasruts manmeri. Em i tok pipel bilong Oro i save kisim sevis long PNG Air na dispela ea sevis bai no inap long stop.

“Mipela i save sevim ol pipel bilong Popondetta na Tufi. Dispela sevis bai go het yet. Mipela bai kisim 7-pela nupela ATR balus na as tru bilong dispela em long sevim ol pipel bilong yumi,” Mista Woo i tok.

Mista Woo, husat i bin stap long Popondetta long yia 1987, i tok tenkyu long sapat Gavana Juffa na Oro manmeri wantaim provinsal gavman i givim long PNG.

“Makim maus bilong ol bod of dairekta, mi laik tok tenkyu long Gavana Juffa, Oro provinsal gavman na ol pipel bilong Oro long dispela bikpela sapat ol i givim long PNG Air.

“Mipela bai larim PNG Air i gat 4-pela ran i go kam long long Girua ples balus insait long wan wan wik.

“Oro Provins bai kirap na gro. PNG Air tu bai kirap na gro wantaim Oro Provins,” Mista Woo i tok.

Mista Abbot i tok PNG Air i amamas long sapatim Oro provinsal gavman long kirapim bisnis bilong turis.

“Balus kampani bilong mipela i gat bikpela poroman wantaim Oro Provins. Long dispela as, mipela i putim wanpela bataflai long nupela logo bilong kampani.

“Dispela bedwing bataflai bilong Oro i stap pinis long dispela nupela ATR balus. Em i balus bilong yupela Oro manmeri.

“Mipela bai sapatim yupela long mekim raun bilong yupela i kamap isi. Mipela bai sapatim Oro i kamap wanpela gutpela ples we planti turis bai amamas long kam raun.

“Ea sevis bilong Popondetta na Tufi bai stap yet. PNG Air bai sapatim Oro provins long kirap,” Mista Abbot i tok.

Westen Gavana Ati Wobiro

PNG Air em bilong yumi! Dispela em i toktok Westen Gavana Ati Wobiro i tokim ol manmeri Daru ailan long Westen Provins tupela wik i go pinis.

“PNG Air em i balus bilong ol pipel bilong Westen Provins. Em i balus bilong yumi. Dispela em i wanpela bikpela invesmen Westen Provinsal gavman na ol papagraun bilong Ok Tedi i mekim,” Gavana Wobiro i tok.

Em i tok ol manmeri bilong Westen Provins i gat bikpela sea long PNG Air aninit long Mineral Risos Ok Tedi Namba 2 (MROT2).

MROT2 em i wanpela sabsideri kampani bilong Mineral Risos Developmen Kampani (MRDC). MRDC em i bikpela seaholda bilong PNG Air wantaim 41 pesen seaholding.

Mista Wobiro i askim ol manmeri long Westen Provins long sapatim PNG Air.

“Mi laik askim Provinsal Administreta bilong yumi na ol arapela senia gavman opisal olsem sapos

ol i laik kisim balus sata, ol i mas kisim PNG Air bikos em i balus kampani bilong yumi yet.

“Mani yumi yusim long baim balus tiket long PNG Air bai kampek gen long yumi yet.”

Mista Wobiro i askim ol manmeri long yusim sevis bilong PNG Air na lukautim ol samting bilong dispela balus kampani bikos em i kampani bilong ol yet.

Mista Wobiro i tok olgeta balus sata bilong Ok Tedi Maining bai go long PNG Air.

“Taim ol i opim gen Ok Tedi Maining, PNG Air balus bai givim balus sata sevis long ol pipel bilong Not Flai na wok manmeri bilong Ok Tedi Maining,” Mista Wobiro i tok.

Em i tok PNG Air i save sevim ol pipel bilong Westen Provins na ol i stap strong yet long sapatim ol pipel.

Sif Eksekyutiv Opisa (CEO) bilong PNG Air, Muralee Siva, i tok dispela nupela balus kampani i luksave long ol pipel bilong Westen Provins bikos ol i papa bilong dispela balus kampani.

Mista Siva i tok PNG Air i luksave long ol pipel bilong Westen Provins bikos ol i sea hola bilong dispela balus kampani.

“Tenkyu long sapat bilong yupela. Sapos yupela i no bin sapatim mipela, dispela nupela ATR balus i no inap long kam long PNG na PNG Air i no inap long bringim ol gutpela senis long kampani.”

“Mipela laik putim manmeri bilong Westen Provins na PNG i go pas. Olsem na mipela i senisim nem bilong kampani i go long PNG Air.

“Mipela i baim nupela ATR balus bikos dispela kain balus i gutpela tru long ran long PNG. Sefti standet na gutpela lukaut em i gutpela tru stret,” Mista Siva i tok.



Siaman bilong PNG Air Murray Woo (givim baksait) i kisim wanpela presen i kam long Oro Gavana Gary Juffa long Girua ples balus, Popondetta. Foto: Aja Potabe



PNG Air CEO, Muralee Siva i tokim ol manmeri long Daru ples balus olsem PNG Air em i balus bilong ol manmeri bilong Westen Provins. Foto: Aja Potabe

Rotari pak maket em seif na gutpela prais



Planti naispela kumu, na fres gaden kaikai i save pulap long Madang Risot maket



Wok long nupela Madang taun maket gavman bilong Japan i helpim long wokim i no pinis yet.

James G.Kila i raitim

OL RUREL maket mama bilong Kamba long Not Ambenob LLG na Bugati long Astrolabe Bei long Raikos i tok olsem ol i amamas long go salim fres gaden kaikai, kumu bilong ol long Madang Risot Rotari Pak maket bikos em i seif na nogat bikhet pasin long hap.

Pastaim deputi Madang taun meya, Christopher Tomongo i tok planti ol mama bilong rurel eria long sait long Bugati i save amamas long bringim ol kumu, sayor, banana na ol arapela fres gaden kaikai long salim long Madang Risot Rotari Pak maket.

Mista Tomongo i tok dispela Rotari Pak em sotpela taim maket ol i kamapim long sevim ol manmeri na pablik long Madang taun bikos em i stap long namel ples we olgeta lain husat i go long taun i ken go na baim kaikai.

“Ol mama yet i tokaut olsem planti taim ol no save pilim seif tumas long go maket long Mildas pablik maket na tu long Balasiko bikos i gat ol planti bikhet lain i save raun raun na stilim ol samting bilong ol.

“Olsem na mipela ol yuts long Kalibobo wantaim ol kaunsil bilong mipela i klinim ples na redim dispela maket we ol rurel mama i ken go salim kaikai na pilim seif na kisim mani na go bek long

ples,” Mista Tomongo i tok.

Long nau yet bikpela wok developmen i go het yet long nupela Madang taun maket, em gavman bilong Japan i givim mani long wokim. Dispela bikpela maket developmen projek em i sanap olsem K26 milien i kam long Japanis Intenesenel Korporensen Ejensi (JICA) wantaim PNG Nesenel Fiseris Atoriti (NFA). Projek bai pinis long mun Mas long neks yia.

Olsem na nau long Madang, planti ol rot-sait maket na tu ol blek-maket i stap long olgeta kona insait long taun na arere long ol setlmen.

Ol meri long ruralviles long Madang olsem wanpela mama bilong ples Kamba long Not Ambenob, Emma Salau, i tok em i pilim moa seif long salim ol kaikai bilong em long Madang Risot Rotari Pak maket. Dispela em bikos ol gutpela kastoma tasol i save raun baim kaikai na ol mama i save pilim fri stret.

Narapela mama bilong Bugati, Ludwina Oireb i tokim Wantok Niuspepa olsem Madang Risot Rotari Pak maket em seif na tu em i stap long naispela eria klostu long taun we i gat ol stua na ol arapela sevis olsem benk tu i stap.

Em i tok taim ol ples mama i maket pinis, ol PMV bilong ples i save go kisim ol long maket, na ol PMV tu i save pilim seif long go long hap.

Abau projek mekim ol pipel i wok

OL ples long Abau distrik, Sentral Provins i wok long painim rot bilong ol yet long stretim ol hevi bilong jenda olsem wanpela hap wok bilong nupela eksen risets projek.

Ol komyuniti memba long Abau i go insait long wanpela 7-pela mun pailot projek we tripela lain risets opisa bilong - Deakin Yunivesiti long Australia na Divine Word Yunivesiti long PNG i go pas long en. Projek i wok wantaim 25 pipel.

Ol risets opisa i wokim ol projek long Jenda Ikwiti na Sosel Inklusen (GESI), long putim ol pikinini meri long skul, na kamapim gutpela helt bilong ol meri, na long kamapim ol sans bilong wokim bisnis bilong ol meri, na kamapim gut literesi na long daunim pasin bilong domestik vilens.

Mani bilong projek em i kam long Australia Gavman, na strongpela sapot i kam long Memba bilong Abau na Minista bilong Pablik Sevis, Sir Puka Temu.

Sir Puka i tok tingting bak-

sait long dispela risets bilong ol komyuniti i luksave long ol hevi bilong ol yet na traim long stretim, em i eksampel bilong “rurel demokretaisesen” we em yet i go pas long kamapim.

“Em long dispela kain projek tasol bai yumi ken luksave tru long gutpela bilong wok wantaim komyuniti engagement, na komyuniti empawamen,” em i tok “Olsem na mi tok strong olsem dispela kain samting tasol i save kirapim kantri; long wok wantaim komyuniti.”

Sir Puka givim toktok long Distrik Developmen Atoriti sif eksekutiv opisa long mekim wok bilong projek go het yet bihain long pailot projek i pinis.

Ekting Kaunsela bilong Australia Hai Komisen, Stephen Hills i tok wok wantaim komyuniti long kamapim developmen em wanpela samting we Australia Gavman i save wanbel.

“Em i wanpela samting we em i bikpela long mipela longpela taim, na mipela olgeta taim i laik sapotim,” em i tok.

Ol lain long komyuniti we i wanbel long stap insait long projek em ol man na meri wantaim. I gat sampela gutpela samting i kamaut long risets we ol i no bin ting bai kamap. Wanpela bilip bilong ol i olsem, ol yangpela meri i wok long lusim skul bikos ol i gat bel. Tasol bihain long risets kwesten i go aut, ol i bin painim olsem ol mama yet i wok long holim ol pikinini meri long haus bilong mekim wok bilong famili. Narapela samting em long ol pikinini i save tok fani na daunim ol husat i no save gut long Tok Inglis. Ol komyuniti memba bai go bungim ol famili bilong ol pikinini meri husat i lusim skul long sapotim ol i go bek long skul.

Projek lida, Profesa Terry Evans i tok pailot projek i soim olsem eksen risets em i gutpela samting long rurel ples long Papua Niugini.

“Mipela laikim tasol 4-pela o 6-pela pipel, tasol mipela i kisim 25. Em i soim gutpela piksa tru,” Profesa Evans i tok.



Ol meri i pilim seif na wokabaut fri long Madang Risot maket



Ramu NiCo karimaut bikpela mentenens na sefti inspeksen

LONG mun Novemba i kam long Disemba i lukim Ramu NiCo i karimaut bikpela wok meintenens bilong en long ol bikpela masin na ikwipmen bilong en long Kurumbukari Main na Basamuk Rifaineri, wantaim 135 km paiplain.

Dispela em namba wan bikpela mentenens wok bihain long prodaksen i bin stat long Disemba 6, 2012.

Insait long dispela wok meintenens, Ramu NiCo i wok strong yet long bringim ap sefti standet bilong en olsem na em laikim olgeta wokman meri bilong kampani na ol kontrakta long bihainim ol sefti lo na wokim samting stret

Long stat bilong mun Disemba, Presiden bilong Ramu NiCo (MCC), Wang Jicheng i bin go wantaim Koporet Menesmen tim bilong Kampani long karimaut wok sekop o inspeksen long Kurumbukari Main long Usino-Bundi distrik. Bihain long en, Presiden Wang i go long Basamuk Rifaineri long Raikos distrik.

Dispela inspeksen i karamapim planti eria long sait long sefti olsem standet opereting prosidja (SOP), job sefti analisis (JSA), ekwipmen meintenens na lukautim ol ples o wan wan seksin bilong wok.

Long KBK Main, Presiden Wang i bin sekim ol wok eria olsem oil tenk, pawa plent, nupela wea-haus, fix na mobail ikwipmen woksop, kromait rimuval sistem, maining eria na tu hairdo-slusing plent.

Insait long miting bilong en wantaim ol PNG na China wokmanmeri, Presiden Wang i givim toktok long sait long sistem bilong stopim paia na tu ikwipmen operesin na trenining.

Mista Wang i tok strong olsem olgeta sefti pepa wok o notis em ol wokman i mas rekotim long tupela tokples, na ol ikwipmen meintenens prosida em ol mas wokim kamapim gut long ol wokmanmeri i bihainim.

"Mipela mas traim long bringim ap nupela wei long bringim ap save na skills bilong ol PNG na China wokman meri bilong mipela" Mista Wang tok.

Ramu NiCo i bin karimaut bikpela mentenens wok long sekim na stretim olgeta bikpela masin na ikwipmen bilong en tu long mun Novemba i kam Disemba.

Insait long meintenens samari ripot bilong Kampani, Ramu NiCo i soim stebol operesin long stat bilong mun Disemba. Dispela i soim olsem olgeta seksen na ikwipmen bilong wok i go orait tasol bihain long meintenens wok.

Dispela wok meintenens we i kamap long Basamuk Rifaineri na tu long KBK Main i lukim ol wok lain i pasim daun olgeta masin na stop wok. Bihain long dispela em wok meintenens i kamap.

Moa long 415 pela bikpela ikwipmen o masin long Basamuk Rifaineri olsem autokleiv, esid sistem na paiplain klinap i bin kamap. Pastaim long meintenens wok i bin kamap ol wok lain i bin go insait long pri-stat miting long bihainim olgeta sefti standet na pasin.

Dispela bikpela wok meintenens i kamap orait stret na i kamap olsem 98.3 pesen gutpela wok mak.

Moa long 120 wokman long BSK Rifaineri i bin stap insait long meintenens na ol dispela lain wokman em ol PNG na China wokman husat i bungim han na helpim long wokbung wantaim

Bikpela wok i bin kamap long ol bikpela prosesing masin olsem hai-presa esid litsing (HPAL) plent, esid plent na ol boila long Basamuk Rifaineri. Na long KBK wok meintenens i kamap long wasing plent, kromait rimuval plent na tu long K38 paiplain long Madang-Ramu Haiwe.

Olgeta dispela wok meintenens i bihainim stret lo na i no bin gat wanpela hevi o birua i kamap long envairomen na tu long sefti bilong ol wokman.

Dispela bikpela meintenens i kamap tu long taim Kampani i lukim 97 pesen disain kapasiti mak bilong en na tu i putim gutpela faundesin bilong prodaksen long neks yia na tu spitim prodaksen mak bilong dispela yia 2015.



Wok meintenens i kamap tu long 135 kilomita paiplain




Presiden bilong Ramu NiCo, Wang Jicheng sekim sefti inspeksen long KBK



Presiden Wang sekim sefti rekot buk long KBK Main dipatmen



Ol menasa bilong Basamuk Rifaineri bung long givim meintenens samari ripot





Robertson i winim snuka sempionsip long UK

MAN long Australia, Neil Robertson, i winim fainel snuka sempionsip long Yunaitet Kingdom (UK).

Dispela win i makim namba tu taim bilong em na i kamap namba wan pilaia we i bin brukim 147 taim long fainel bilong tonamen.

Robertson i kam long frem 6 long Mande moning na i kisim 4-2 na daunim man Saina, Liang Wenbo, na i kamap namba wan long ol 19

fainel na i kisim 44, 000 paun o \$90, 612 bonus mani.

Robertson i amamas moa na putim han bilong em i go antap long York Barbican Senta bihain long em i singim blek.

Dispela fainel em i namba 3 taim bilong Liang, husat i amamas na holim pasim birua pilaia bilong em.

Liang i no bin pilai gut long pinisim 4-pela frem na Robertson i pinisim 3-pela frem long

kisim tropi bilong UK.

"Olsem ol pikinini, yu laik mekim 147 long BBC televisen na driman bilong mi i karim kaikai," Robertson i tokim BBC.

Liang i bin go insait long top 16 taim em i go long fainel.

"Mi stap long presa na mi no pilai gut," Lilang i tok.

Thepchaiya Un-Nooh em i man long Tailan i singim olgeta bal pas long tonamen, tasol em i no singim fainel blek.

Australia i kisim ODI resis long Ingran

AUSTRALIA i daunim Ingran 3-2 long wanpela de intansenel kriket resis. Ol i win long namba 5 na fainel gem long Old Trafford wantaim 8-pela wiket.

Ol Ingran i painim hat tru long kisim ol poin, tasol Australia i isi tasol kisim ol poin na bungim mak bilong win.

Ol Ingran i painim hat taim bikos planti pilaia bilong ol i no bin pilai long fainel.

Kapten bilong Ingran, Eoin Morgan, i bin pinis long pilai bikos, Mitchell Starc i straikim bal strong na kisim long helmet na baksait long het bilong em. Morgan i bin pundaun long pilai graun na nau em bai no moa pilai. Taylor i tingting long kisim sia bilong kapten inap long gem bai pinis.

Ben Stokes i pilai gut egensim ol Australia. Em i

straikim bal strong na helpim ol Ingran long stap pas wantaim 50, tasol poro pilaia bilong em, Jonny Bairstow, i painim hat long pilai strong na ol i ketsim.

Moeen Ali tu i no gat strong na i straikim bal isi we ol birua pilaia i no painim hat long ketsim bal. Olgeta pilaia i mekim wankain asua na ol Australia i no givim sans long ol.



Murbury i stap yet long namba wan sisen

STEPHON Murbury na Kevin Garnett i kamap top pilaia bilong Nesene Basketball Asosiesen (NBA) insait long 20 yia na i kamap namba wan pik na rol duo bilong Minnesota Timberwolves. Nau tupela i laik kamap namba tu bilong Karl Malone na John Stockton.

Tasol bihain, Garnett i kamap hiro bilong kalt na

NBA sempion, na Murbury i go stap long Saina.

Garnett i save wok long Minnesota Timberwolves na kamap strongpela sapota bilong 2015 NBA sisen.

Long 2015 ov sisen, pilai bilong ol Ducks, Li Gen, i no pilai bikos i gat sampela asua i bin kamap taim ol i bin pilai wantaim ol Xinjiang Tigers.

Li i save stap baksait long

pilai graun long Beijing wantaim ol sampela pilaia long Saina, i na tokim Murbury long stap resev. Taim Li i kam aut, Murbury i go insait long pilaia graun na bungim bikpela salens.

Murbury i kisim 20.4 poin, em i sanap long sait na kisim 5.0 poin, na em i helpim ol narapela poro pilaia long kisim 6.9 poin i mekim na

Ducks i winim dispela pilai.

Murbury em i wanpela pilaia tasol i go insait na putim planti skoa na setim ol poro pilaia long painim rot long kisim skoa.

Tupela senia pilaia bilong Duck, Randolph Morris Morris na Sun Yue, i pilai gut, tasol Murbury i painim rot bilong tupela long kisim ol poin.

Dispela win em i namba tri win bilong Murbury na em i stap namba wan pilaia yet, tasol Garnett i no pilai olsem, nogat.



Sanfrecce Hiroshima i winim J. Lig taitel



Meiji Yasuda Life J.League's 2015 kempen i pinis na win bilong Sanfrecce Hiroshima long J1 title tropi i stori bilong wanpela kempen long planti yia.

Long namba wan hap sempionsip pilai siris, tripela divisen i bin pilai gut na pos sisen pilai of i bin pulim planti nupela fen we tupela hai kwaliti praim taim brotkas long nesen waid TV, Hi-

roshima's Big Arch ("Edion") Stadium si bin salim olgeta tiket long namba wan taim insait long 20 krismas. Opisek rekot i soim olsem 37,000 pipel i go lukim plilai.

Pilai i bin gutpela tru na bikpela salens namel long tupela sait, tasol wantaim tupela gol ol i wokim pinis, Sanfrecce Hiroshima i bin wokim strongpela plen egen-

sim Gamba Osaka we i save strong long skorim ol gol.

Ol Purple Archers i bin blokim tru ol narapela tim na i no larim ol i skorim planti gol long dispela sisen winim ol narapela J1 tim, na veteran yunit bilong ol i bin strong tru, maski ol lain bilong Gamba i traime het long daunim ol.

Sanfrecce i pilai gut na i bin winim dispela pilai.

Chelsea bai kisim husat long kisim ples bilong Costa?

Diego Costa i no spesel.

Ol i autim em long bens we sko i bin 0-0 draw long Spurs, na kosa Jose Mourinho i tok dispela i bin gutpela pilai lwe tim bilong em i bin putim kamap, long dispela sisen, pilai bilong Portugal i bin stap long spotlait olsem top skora bilong tim long las sisen.

Kosa Mourinho i autim pinis Eden Hazard, John Terry, Nemanja Matic, Cesc Fabregas na Branislav Ivanovic taim em i painim ansa long ol isu we Chelsea i gat long dispela sisen. Olsem na autim Costa i bihainim tingting na plen, maski foma Atletico i no amamas.

Mourinho i kisim Hazard em senta fowed, long kisim ples bilong Costa i soim olsem em i nidim stret wanpela pilaia long kisim ples. Radamel Falcao i bin kisim bagarap, na Loic Remy i stap long pateniti liv.

Hazard i no save pilai long



dispela posisen bipo na tu, em i no bin putim wanpela sko long sisen na pastaim tu, Mourinho i bin wokim wankain taim em i putim Andre Schurrle i go long fran taim ol i bin pilai long Old Trafford long 2013.

Nau Costa i no pilai i nap givim em strongpela tingting long pilai gut na putim sampela sko long dispela wiken taim ol i pilai long ples graun long Bournemouth.

Tasol ol ripot, Costa i no inap stat pilai wantaim Stam-

ford Bridge long neks sisen. i bin pilai aninit long Mourinho bipo long Real Madrid, na em i wanpela gutpela pilaia husat i save putim planti sko.

Dispela i wanpela samting we Chelsea i laikim long dispela taim, na i gat sans long em i joinim Chelsea long kisim ples bilong Costa.

Ol narapela we ol i mas gat bikpela mani long pulim ol em Gonzalo Higuain, Antoine Griezmann na sampela arapela nem moa.

Gigira Laitepo paia long Bisini

Admiralty holim Dwellers long Lae

Nicky Bernard i raitm

GIGIRA Laitepo FC i strong yet long Bisini soka graun bihain long ol i bin daunim Pom FC long namba tu raun bilong Telikom Nesenel Soka Lig long Pot Mosbi. Long raun tri ol bin dro wantaim PS United FC.

Long Sauten NSL pilai long Mosbi, Pom FC i BIN pilai wantaim Rapatona long namba wan pilai long Binis we Pom FC i win 2-0 taim ol i kam bek long win bihain long ol i bin lusim tupela pilai bilong ol.

Dispela tupela gol bilong i kamap long pawa leg man bilong Madang Neill Hans long namba wan hap na namba tu hap bilong pilai.

Long mein gem long api-nun i lukim Gigira FC i traim long mekim namba tu win bilong ol tasol ol boi PS i strongim sait bilong ol na holim ol inap long pilai pinis.

Gigira i gat planti sans long namba wan hap tasol straika bilong ol i no holim gut ol bal long lek bilong em.

Tupela klia penelti referi i no givim na dispela i mekim ol kosa bilong Gigira i no bin sindaun gut long sait lain.

Tupela tim i bin kam malo wantaim 0-0 long namba wan hap na tupela kosa i toktok strong long ol pilai long senis pilai bilong gen long namba tu hap.

Gigira i mekim wanpela senis long winga bilong ol na putim yangpela Misima

mangi Julai, go insait na em senisim pilai bilong ol Gigira na 6 minit long pilai em putim namba wan gol bilong ol.

Gigira i gat olgeta sans long namba tu hap, tasol ol i no bin pinisim gut long kamapim ol gol. PS United FC i gat tupela sans tasol na wanpela bilong i kamap long go we i lukim tupela tim wantaim i dro 1-1 long pinis bilong pilai.

Long narapela pilai long Sande, Hekari i daunim ol Galp Erema 3-0 na long Lae, Admiralty i holim ol mangi Lae na las yia sempion Dwellers 0-0 na Madang i daunim Goroka 3-0.

Long dispela wiken bai lukim Bisini graun bai holim tupela gem long Sarere, na long Sande bai wanpela gem.



Winga bilong PS United i ran wantaim bal taim beks bilong Gigira i banisim em long pulim bal go moa yet. Tupela tim i dro 1-1. Foto Nicky Bernard

Bihain bilong PNG Boksing i luk gut

PAPUA Niugini (PNG) Boksing i redi long go bikpela bihain long sampela toksave long wiken.

Dispela spot i amamas long sampela bikpela win dispela yia wantaim 8-pela gol medol insait long 13 ol i putim long Julai Pasifik Gems long Pot Mosbi na gol pefomens bilong Thaddeus Katoa long Wol Yut Komonwelt Sempionsip long Samoa.

Tasol, bihain long win las wik long nesenel sempionsip long Kavieng, wanpela namba wan samting long kamap long liklik senta we New Mekeo i kamap sempion asosiesen na John Avira i kamap presiden bilong PNG Boksing Yunien. Sampela bikpela toksave long sait bilong sapot long mani i mekim dispela spot i nais tumas.

New Mekeo i kamap namba wan wantaim ol gol medol na weit divison taitel i go wantaim i kisim luksave long Sentrel provins bes asosiesen i len long Ben Micah Spots Kap.

Ben Micah Spots i stap insait olsem ol iven menesa bilong Nesenel Boksing Sempionsip long helpim Kavieng Amateur Boksing Asosiesen na PNGBU i karim aut kain bikpela iven olsem.

John Avira i go pas wantaim ol eksekutiv bilong en.

Minista bilong Pablik Entaprais na Stet Invesmen na memba bilong Kavieng open,

Ben Micah i stap insait long wanpela fainel long Sande.

'Mipela i amamas long lukim Minista Ben Micah na em i rait tu long askim em long stap bikos em ilektoret bilong en tu,' Mista Avira i tok.

'Tasol kain sapot mipela i kisim long Minista em i gutpela tru na wantaim Kumul Konsolidet Limitet i sapotim mipela olsem spona i daunim planti presa long helpim wantaim mani long nesenel sempion.'

'Mipela i tok tenkyu tu long siaman Paul Nerau bilong Kumul Konsolidet Holdings husat i kamap long Sande long stap insait long dispela fainel,' Mista Avira i tok.

Long wankain taim, Minista Micah bai apim sapot bilong en na yusim ol gavman netwok bilong en long putim dispela spot long level bilong wol.

Minista Micah i tok gavman i save long bikpela strong we spots i ken wokim long promotim kantri long wol level wantaim Pasifik Gems na bikpela ragbi lig long PNG Hunters i pilai long Kwinslan Intras Supa Kap i tokaut long dispela.

'Mipela (gavman) i laik helpim long wankain rot bilong boksing we i gat bikpela strong long putim PNG long wol mep,' Mista Micah i tok.

Em i givim piksa long ol pelapa boksa olsem Martin Beni, leit John Aba na Tumat Sogolik husat i bin soim olsem PNG i gat strong long dispela spot.

Ol PNG sumatin i kamapim Ragbi lig tim long yunivesiti bilong Batangas

LONG Ogas 2013, planti Papua Niugini (PNG) sumatin i stadi long ol kolis na yunivesiti long provins bilong Batangas long Pilipins, i misim tru Ragbi Lig na ol i kamapim Batangueno Mandirigmas (Batangas Waria) ragbi lig tim.

Dispela i kamap bilong ol PNG sumatin i stap long ol kolis na yunivesiti i ken pilai dispela gem.

Olgeta i save long nupela gem i kamap long Pilipine Nesenel Ragbi Lig (PNRL), ol i amamas long pilai long nupela Lig na Jannel Dela Torre i bung. Tasol, bikos long planti eksam na long-

pela rot, ol i askim ol long pilai tasol ol Batangas Waria i no bin inap long resis long namba tu PNRL Ragbi Lig 9s tonamen long Pilipins long Oktoba 2013.

Em i kisim narapela yia gen bihain long sans bilong ol long pilai bai kamap. Sans bilong ol long pilai i kamap gen long Septemba 16 long Adventis Yunivesiti bilong Pilipines (AUP), long PNG independens de Ragbi Lig selebresen tonamen.

Long namba tu yia, ol i resis gen long las Septemba long dispela yia long independens de long AUP.

Wantaim planti foren sumatin i skul long Yunivesiti bilong Batangas (UB), wanpela namba 3 yia sivil enjinia sumatin, Ismile Kepu, husat i presiden bilong Intanesenel Sumatin Ogenaisesen long UB i painim aut olsem em i hat long painim spona bilong Batangas Waria bikos planti lain i no save olsem i gat dispela kain gem.

Long wanem planti foren sumatin i stadi long UB i bilong PNG, Ismile i raitim leta i go long Presiden bilong yunivesiti, Dokta. Hernando B. Perez long askim tok orait long lainim Ragbi Lig insait

long opisal spot program bilong yunivesiti.

Presiden i tok orait long dispela leta na i tok orait long spona na baim jesi bilong klap.

Mista Ismile i amamas na tok tenkyu long Presiden Dokta Hernando long mekim isi na tok orait long lainim ragbi lig long ol sumatin long Pilipins.

Long 27 bilong mun Novemba long dispela yia, nupela UB Toro Ragbi Football Tim i amamas long stap insait long anuel yunivesiti bilong Batangas Spot mas de, na ol i soim nupela spot long skul na provins bilong Batangas.



Ol UB Toro i werim nupela unifom bilong ol.

JCI Taitens bai pilai long Nesenel Konfederet

Philemon Tame i raitim

JCI TAITENS i daunim ol Buria Reds 15-12 long go insait long Nesenel Konfederet resis long Lae, Morobe long yia i kam, 2016.

Wanpela strongpela pilai i bin kamap namel long tupela taim, Taitens na Reds, bihain long tupela tim long Nesenel Kapitel Distrik i pilai pinis long las wik Sarere

Kone Tigers pilai graun i pulap tru taim pilai i kamap. Ol sapota bilong tupela tim wantaim i sanap arere long pilai graun na i bikmaus long sapotim tim bilong ol.

Long namba wan hap bilong pilai, winga bilong ol Buria Reds i bin opim trai bilong ol na putim namba wan trai long namba 8 minit.

Ol Reds i stap pas wantaim 6-0 poin taim kik bilong ol i go insait.

Ol sapota i amamas long namba wan trai i kamap, tasol Taitens i no bin putim narapela moa spes bilong ol Reds long skruim poin inap ol i bin bungim namba tu hap

bilong pilai.

Bipo long bungim namba tu hap bilong pilai, Taitens i bekim namba wan trai bilong ol Reds long 15 minit bilong pilai na i levelim skoa, 6-6 wantaim stail kik bilong bilong ol.

Taitens i putim wanpela moa trai klostu long bungim taim bilong malolo na i skruim skoa i go antap long 10-6 taim kik i abrus long go insait.

Taitens i bin kisim ples bilong ol Reds na i stap pas wantaim tupela trai long namba wan hap bilong pilai.

Long namba tu hap bilong pilai, ol Taitens i kisim fil gol na skruim skoa bilong ol wantaim wanpela poin 11-6.

Wanpela sapota na kolwara boi bilong ol Taitens i laik go insait long pilai graun taim ol Taitens i kisim dispela fil gol, tasol lainsman i rausim em i go arasait.

Laspela trai na namba tri trai bilong ol Taitens i bin kamap klostu long bungim pinis bilong pilai na kik i no bin go insait. Skoa i sanap olsem 15-6.

Banis bilong ol Reds i slek tumas na tu ol i no ran strong

tasol, las minit ol i bin putim las trai bilong ol na kik bilong ol tu i go insait. Ol i bringim skoa bilong ol i kam antap tasol long 12, tasol ol i bin let pinis na belo i krai.

Ol Taitens i winim dispela resis na ol bai go pilai long Nesenel Konfederet Sempionsip long Lae.

Ol ragbi lig opisal i givim k1500 i go long Taitens na K700 long ol Reds.

Ol opisal husat i ogenaism dispela resis i tok olsem, tupela tim wantaim i strongpela tim bikos tupela em i namba wan tim bilong Hiri Ragbi Lig na Gaire Ragbi Lig long Sentrel Provins.

Taitens i kisim K1500 long ol i kamap namba wan moa yet long dispela resis, na ol Reds i kisim K700 long ol i daunim olgeta tim insait long klap na i kam inap long dispela kain resis.

Bipo long ol Taitens bai go long resis long Lae long yia i kam, ol opisal i askim ol long kam pilai long kap bilong gavana long krismas long strongim skil na teknik bilong ol.



Pilala bilong ol JIC Taitens i laik pilaim bal i go long poro pilala bilong em long baksait, na klostu long trai lain bilong ol. Dispela pilai i kamap aninit long wanpela strongpela san na das i karamapim pilai graun. Ol pilala i brukim bun long kisim ples long Sauten jon konfederet long go pilai long Lae, Morobe long yia i kam, 2016. Aninit long Sauten Konfederet em tupela tim bai go pilai we wanpela bilong ol em i JCI Taitens. *Poto: Philemon Tame*

Hai pefomens senta i go long nupela opis

HAI Pefomens Trening Senta (HPTC) bilong Papua Niugini Olimpik Komiti (PNGOC) i stat long muv i go long nupela haus bilong en long Taurama Indor na Akwatik Senta (TIAC) long Pot Mosbi.

Dispela muv em hap bilong trensefe bilong HPTC bilong PNGOC i go long Papua Niugini Spots Faundesens (PNGSF), we ol i bin tokaut long TIAC long Tunde 8 Desemba.

Wantaim sapot long gavman, PNGOC i bin kamapim HPTC long 2014 olsem hap bilong Hai Pefomens Divison bilong en na i mekim bikpela wok long trenim na kamap wasman bilong ol Tim PNG etlit, ol kosa na ol opisa, long redi long 2015 Pasifik Gems tasol ol narapela intanesenel iven tu.

Long Hai Pefomens Divison, PNGOC i ken givim ol wol klas spot trening, kosa na ol namba wan rot bilong prektis long kain kain ol hai pefomens spot olsem marasin bilong spot, fisioterapi na redi long kompetisen bilong ol etlit na opisa bilong Tim PNG.

'PNGOC i gat longpela na gutpela rilesensip wantaim PNGSF na mipela i amamas long gro na mekim dispela patnasip go bikpela, i go long Hai Pefomens Trening Senta,' Presiden bilong PNGOC, Sir John Dawanincura i tok.

'Gavman i mekim bikpela wok long gutpela bilong Tim PNG long 2015 Pasifik Gems taim ol i sapot long redi wantaim Hai Pefomens Program insait long 'G4G' fanding. Mipela i amamas olsem dispela hap bilong hai pefomens spot bai go het long helpim ol spot bilong yumi,' Sir John i tok.

PNG Olimpik Komiti bai go het long mekim Hai Pefomens program bilong en yet na bai wok klostu wantaim PNGSF long luksave olsem ol etlit long Tim PNG, ol kosa na opisa i kisim sapot long go het long mekim gut pefomens long level bilong wol.

Long wankain taim, CEO bilong PNGSF, Peter Tsiamilili i tok klia long sapot bilong gavman long HPTC fasiliti na operesen bilong en insait long baset bilong 2016.

'PNG em i redi long go het ol sevis na program long ol etlit bilong Tim PNG na Hai Pefomens Stiring Komiti bai i stat wantaim PNGSF na ol pipel i makim PNGOC long lukim na kamap wasman bilong hai pefomens program bilong ol etlit na kosa,' Mista Tsiamilili i tok.

Pres Konpres i toktok long muvim opis na ol trening program we ol spot manmeri i ken kisim long Hai Pefomens Trening Senta.



Linking our country



Reservations - Toll Free: **180 5465**
email: sales.linkpng@airniugini.com.pg
Find us on Facebook: www.facebook.com/linkpng



HET I GO DAUN: Pilaia bilong JCI Taitens i painim hat tru long brukim banis bilong ol Buria Reds. Tupela pilaia bilong ol Reds i putim het bilong birua pilaia i go daun pas na tupela lek i kirap olsem han bilong diwai taim win i save blo. Taitens i win, 15-12 long Kone Tigers pilai graun. *Poto: Philemon Tame*



PILAI BAL KWIK TAIM: Pilaia bilong JCI Taitens i laik putim trai na laikim poro pilaia bilong em long pilai bal kwik taim, klostu long trai lain bilong ol Buria Reds. *Poto: Philemon Tame*



HOLIM EM: Pilaia bilong ol Reds i laik stopim birua pilaia bilong em taim ol manmeri i lukluk i stap. Dispela pilai i kamap strong stret long taim san i hot, tasol planti lain i banisim pilai graun bikos dispela em i tupela strongpela tim bilong sentrel provins aninit long Hiri Ragbi Lig na Gaire Ragbi Lig. JCI Taitens i daunim Reds na i kisim ples long Sauten Konfederet seleksen we lo bai go pilai long Lae, Morobe. *Poto: Philemon Tame*



ABRUSIM OL: Pul bek bilong ol Taitens i kisim bal taim ol Reds i kikim bal i go long sait bilong ol Taitens. Pul bek i abrusim birua pilaia husat i bin kam pas long atekim em na em i pundaun i stap long rait sait. Nau em i painim wangepa gep namel long ol birua pilaia na i laik ran i kam aut. *Poto: Philemon Tame*



TRAI KAMAP: Ol Buria Reds i brukim banis bilong ol Taitens na putim namba tu na las trai bilong ol i skruim skoa bilong ol i go antap long 12. Reds i kam klostu long ol Taitens, tasol taim i ran egensim ol na Taitens i win. *Poto: Philemon Tame*



NETBAL: Bik nam pilaia bilong Victoria Netball tim long Australia i kam raun long Pot Mosbi long mekim awenes bilong Water Aid PNG long dispela wik. Em i sindaun long rait han, na namel em tim opisol na long lep han em kepten bilong Pepes Lua Rikis. *Poto: Nicky Bernard*



SOKA: Tim Gigira Laitapo FC i redi long kisim pilai graun long las wik Sarere. Ol dro wantaim PS United FC 1-1. *Poto: Nicky Bernard.*

IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



Emi tuna
bilong PNG

PROUDLY
PNG
MADE

Manufactured by:



RD Tuna Canners Ltd.

Moa mit na
oil insait



TUNA IN OIL

Sans long Marum i ken kosim Kumuls

Philemon Tame i raitim

KOSA bilong PNG SP Hunters, Michael Marum, inap g kamap kosa bilong PNG Kumuls nesanel tim sapos em i gat sans.

Oi Kumuls bai painim nupela kosa bihain long kosa Mal Meninga i tokaut olsem em i kisim nupela wok olsem het kosa bilong Australia.

Meninga i sainim kontrak wantaim PNG Ragbi Lig long kamap kosa bilong Kumuls inap long 2017 wol kap, tasol em i tokaut olsem em i nupela het kosa bilong Australia.

CEO bilong PNG Ragbi Lig, Bob Cutmore, i tok olsem ol i bin pasim toktok long husat bai kamap kosa bilong PNG Ragbi Lig bihain long kontrak bilong Meninga bai pinis.

Mista Marum i autim laik bilong em long dispela posisen we Meninga bai lusim.

Marum i tok long tingting bilong em yet, em i ken kamap kosa bilong PNG wantaim ol ekspiens em i gat long en.

Tasol, Wantok Niuspepa i kisim tingting bilong planti pipel long PNG.

Steven Pora long Is Boroko long Pot Mosbi i tok aut long tingting bilong em olsem, "Mi laikim Marum long stap het kosa bikos em i gat inap ekspiens long kamapim sampela senis insait long Papua Niugini Ragbi Lig, long wanem, em i bin kosim SP

Hunters i go long fainel na em i namba wan mak bilong em long stap kosa bilong Kumuls."

Long wankain taim, Peter Peke, husat i save stap long Saina taun long Pot Mosbi i tok, "Marum i no save kisim ol pilaia aninit long stretpela rot. I gat ol narapela gutpela kosa i stap long PNG, na watpo mipela i no yusim ol straksa we Kwinslan (QLD), Nu Saut Wels (NSW) na Australia i save yusim? Oi dispela kosa i stap long kisim ples bilong ol bikpela kosa na mipela i no yusim dispela kain straksa yet."

Steffy Seposa, husat i save laikim ragbi i tok, "Mipela i kisim Meninga long stap kosa em i kosim bikpela mani long PNG Ragbi Futbol Lig, na ol Kumul i bungim hevi bikos PNG-RFL i nogat mani. Na tu, Kumuls i no i bin win wanpela taim aninit long kosa bilong Meninga, nogat. Nau mipela i laikim wanpela kosa husat i save putim lewa long PNG, i ken toktok gut wantaim tim ol ol pilaia, em i gat rispek long tim na PNG, na wokim wok strong. Mi ting olsem Marum ken mekim wok gut."

Robin long 4 Mail long Pot Mosbi i tok olsem sapos PNG i kamapim sampela gutpela pilaia long pilai long ol narapela kantri, PNG tu i ken kamapim ol gutpela kosa long kosim ol ragbi klap long narapela kantri. Larim wanpela PNG yet i ken kosim Kumuls."



OL BIKMAN BILONG SPOTS LONG PNG: Spots na Ivens Minista, Justin Tkachenko wantaim ol bikman bilong PNG Spots Federe-sen long taim bilong tokaut long muvim opis bilong Hai Pefomens Trening Senta (HPTC) i go long Taurama Indo Akwatik Senta long Mosbi. Long hansut bilong Spots Minista Tkatchenko em longpela taim Spots Edministreta na Presiden bilong PNG Olimpik Komiti, Sir John Dawanincura na bikmeri em Seketeri bilong PNG Olimpik Komiti. Long hankais em Sif Eksekyutiv Opisa bilong PNG Spots Foundesen, Peter Tsiamalili Junia na Graham Osborne narapela bikman bilong spots edministresen long PNG. *Poto: Andrew Molen*

Smail Wantaim



Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg

Ol samting long klinim tit.